

宋元詩會卷之五十五

皖桐陳焯默公輯選

後學程

仕松泉叅較

韓信同

字伯循別號古遺與石堂先生同里為及門士宋亡不復仕進為雲山書院長



碁盤仙跡

唐山絕頂碁盤石戲局流傳名自昔殷勤細問白髮翁云是仙人曾對奕苔封石磴不敢移竹引清風時拂拭箇中黑白子不留想是仙童為收拾又不聞採樵之人王子質邂逅仙人執手談羸輸未決藏機密貪看柯欄不知時少憇山中方七日誰識囊中日月長歸來塵世無相識

此詩為詠石堂山中八景之一

岳王墓

妖星墮地芒角赤龍劔悲吼風蕭瑟原王氣挽不回將軍一



死為毛擲秦家小兒真戲劇播弄造化搖樞極指讐為親忠且
逆隻手上遮天眼碧九重茫茫隔天日無由下燭臣愚直臣愚
萬死不足惜國恥未湔猶憤激古墳埋冤血空漜風雨年年土
花蝕我恐精忠埋不得白日英魂土中泣請將衰骨斷苔痕獻
作吾皇補天石

彭秋宇

宋末人元師南渡有乙亥紀聞併秋興詩附見

秋興

沙塵破褐客秋風落落親朋半老翁野曠有時聞嘯虎天寬無
處寄征鴻四方玉帛燕山北萬里帆檣海水東回首昇平歌舞
地芳花石礎樹陰中

乙亥紀年二首

羽書朝暮漲氛埃天詔勤王起草萊塞上風高鷹颺去江頭霧
暗馬飛來諸賢忠愛謀安出四將英靈喚不回漠漠雲天秋萬
里飛鳴無數雁鴻哀

西風捲地送淒涼目斷歸帆落日黃雁過江天雲漠漠龍遊滄
海水茫茫故人入夢三更月近事驚心兩鬢霜試把濁醪澆磊
砢樽中猶帶蕙蘭香

世事

茫茫世事等浮萍愁緒方濃酒又醒日月雙飛天不老干戈百
戰地常腥此時弓馬多秦戍何日箭韶備魯庭宇宙西風愁下
盡誰家門巷草青青

林景熙

字惠陽號霽山温州平陽人咸淳辛未太學釋褐官禮部郎宗亡不仕客居會稽會楊璉真伽發宗諸陵景熙與

友人唐珏潛募義士收其棄骨景熙得高孝二函併珏所收者葬于蘭亭樹冬青以志之其詩有白石樵唱六卷悲憤悽惋視謝皋羽為一致云

南山有孤樹

南山有孤樹寒鳥夜遠之驚秋啼眇眇風撓無寧枝託身未得所振羽將遊逝茲高翔犯霜露卑飛觸茅茨乾坤豈不容顧影空自疑徘徊向殘月欲墮已復支

故衣

篋中出故衣絡緯聲四壁昔年慈母線一一手所歷眷眷遊子心惻惻虛堂夕逝水不返流孤雲杳杳無迹空令攬衣人一線淚一滴衣敝耐有時母恩無窮期終憐寸草心何以報春暉朝寒縱砭骨念此不忍披且復返所藏永寄霜露思

九日會連雲樓分得落字

冉冉海霧深荒荒山日薄登高集華裾縱目天宇廓落葉悲徂年寒英照深酌心醉乃文字意行非澗壑緬懷斜川遊此道久寂寞胡為吹帽人白首戀賓幕窮途謬行藏異代懸美惡我愛漉酒巾西風不能落

訪二陸故居

風流懷二陸才名動三吳斯人不可作千載空煙蕪當時騁俊筆萬象爭先驅有如明月璧羨價傾鴻都世運有翻覆韞匱真良圖惜哉去就乖毀此千金軀人生皆有死百年同湏臾獨遺文字芳乃與天壤俱淒淒崑山寒冉冉谷水枯白鶴久已寂黃犬誰復呼荒祠挂殘陽扁舟入菰蒲采蓴薦秋風庶以明區區

納涼過林氏居

出郭已虛曠入門轉蕭森筠樓無六月聊以解我襟紅日不到

地白雲時滿林坐久石根冷酒醒荷氣淡飄飄黃冠客臨流鼓
瑤琴一鼓洗我耳再鼓空我心山高水復迥彷彿蓬萊音興盡
拂衣去城笳吹夕陰

曉意

僧鐘覺曙鳥紛飛弄林光宿雨漸停雷人起開秋房南山忽入
几相對各老蒼流泉送日月危石支興亡問山山無言啼猿起
前岡

妾薄命

盈盈梁家姝奕奕晉朝使解珠不論貧得備巾櫛侍一笑金谷
春列屋俱劒歛避豈知錦步温已復為愁地念惠妾深緣妾為
主累樓頭風雨淡殘花抱春墜

酬謝臯羽見寄

入山採芝薇射虎據我丘入海尋蓬萊鯨鯢掀我舟美人渺天
末瑤音寄青羽自言招客星寒川釣煙雨行行古臺上仰天哭
所思餘哀散林木此意誰能知

過風門嶺

客來自風門颼颼撼兩袖溪迴衆峰新畎絕一嶺又行行春日
微怪禽啼白晝流年感花稀古道表松秀聊此寄小酌餘酣掬
山溜

新豐道中

長飈卷炎埃澄空出秋素迢迢鐵甕城回首隔蒼霧酒帘颺荒
市笳鼓發溪戍倚篷問舟人云是新豐路籬落鷄欲栖野水牛
半不見抱琴人斜陽在高樹

商婦吟

良人滄海上孤帆渺何之十年音信隔安否不得知長憶相送處缺月隨我歸月缺有圓夜人去無回期回期倘終有白首寧怨遲寒蛩苦相弔青燈鑒孤幃妾身不出幃妾夢萬里馳

寄周計院

海桑變紛紛秀色見孤嶼山林華髮尊黨遂潑衣古獨餘釣天夢翛然在巖戶翳翳桂魄灰沈沈槐夢兩江濤豈不深修鱗挂網罟不知義井船秋風繫何許

雜詠酬汪鎮鄉

名鼎平陽人二首

百感淒孤夜江樓起呼月秋蟲聲轉悲念此衆芳歇人生非金石青鬢忽已雪踰淮橘心移出山泉性汨倚蘭抱孤芳不受宿莽莽沒

權臣坐偃月棄官如飄蓬及茲顛沛秋然翻然挺孤忠一死未

所網羅挂秋鴻渡淮已不食蛻槁夷齊風何人續遷史表為節義雄

石翁嫗

束艾楚俗愚鑄金秦民怖何年斷雲根偶立此翁嫗千春衣莓苔偕老食風露世人輕結髮覆水或旦暮乃習無情緣永與天壤固父老向我言曾是深朝墓衣冠化黃土古丘亦成路當年殉金棺茲物獨如故閱世如過客興亡了不悟時借牛礪角敲火戲童豎

宴德初書樓

樓高不二尋已作百尺想中有湖海豪開襟納萬象頗延素心人談笑落清響鄰花吹午香簷竹薦秋爽于中了行藏此外斷俯仰西樓富熏天歌鐘樂華敞荒涼風雨餘山夔自來往

寄四明陳楸陽

高人謝世氛誅茅在絕壁十年不下山
舊路掩深棘出門復踟躕觸步有崩石
下臨千仞淵毒鱗正紛籍腥風鼓洪濤
石齒鳴咋咋失勢倘一落萬縷那可及
不如息我軀猿鶴與朝夕

春感

柳花袞雪春冥冥溪風一夜吹為萍
萍隨風去渺流水人生無根亦如此
故山入夢草芊芊半窗疎雨寒食天
曉來白髮稀可數多少朱顏化黃土
高原冉冉青煙斜麥飯酒松能幾家
子規叫殘金粟暮繭紙蘭亭已飛去

贈泰霞真士時祈雨有驗

火旂焰焰燒坤垠蒺藜滿道風揚塵
槁苗無花不作穀老農扶杖田頭哭
哭聲不為填溝渠室磬何以供官輪
檄龍吟佛寂不

應蜥蜴那能擅灌柄泰霞真士鞭風
霆綠章叩天天亦驚玄雲沛雨起膚
寸點點都是盤中飯頃頃收歛歸無
聲翩然駕虬出山城我聞調元功自
古亢為常賜伏常雨廟堂有道司牧
良坐看玉燭開金穰淮南捕蝗蝗更
在饑蛟螫人陸成海肥羊日日供大
官論功乃使專黃冠真士寸田無水
旱天機子夜交離坎

餞盛景則教授

空明仙人朝帝所跨鶴凌虛墮霜羽
洞中石髓流不乾聖泉寫入君肺腑
潘江陸海一目盡自提修綆汲千古
碧芹水冷涵夜燈丹鳳山空鳴曉鼓
有時白戰風騷場小巫見之縮雙股
飯雖不足仁義腴墻陰老薺美味苦
丈夫出處各有道天地綱常要撐拄
俗吏惟知騁刀筆腐儒亦或拘訓詁
雲霧窗寒森寶書廣文袖有修月斧
離亭酒短秋帆開鴈蕩峰前桂花雨

題陸放翁詩卷後

天寶詩人詩有史杜鵬再拜淚如水龜堂一老旂鼓雄勁氣往
往摩其壘輕裘駿馬成都花冰甌雪椀建溪茶承平麾節半海
寓歸來鏡曲盟鷗沙詩墨淋漓不負酒但恨未飲月口首牀頭
孤劍空有聲坐看中原落人手青山一髮愁濛濛干戈已滿天
南東來孫却見九州同家祭如何告乃翁

冬青花

元僧人楊勝亦名連真瑯官釋教總統置署於杭
城畫發宋帝諸陵之在越者其骸骨棄草莽中
莫敢收景熙等痛憤不已相率為采藥者至陵上拾而
收之又購漁人網得理宗顱骨於湖水中作二函託言
佛經葬越山因
種冬青識之

冬青花花時一日腸九折隔江風雨晴影空五月潑山護微雪
石根雲氣龍所藏尋常螻蟻不敢穴移來此種非人間僧識萬
年觴底月蜀魂飛遠百鳥臣夜半一聲山竹裂

附唐珣詩

冬青花不堪折南風吹涼積香雪遙遙擎蓋萬年枝上有鳳
巢下龍穴君不見大之年竿之月霹靂一聲天地裂時雷震
白塔

又一首

馬箠問髡形南面欲起語野麈尚屯束何物敢盜取餘花拾
飄蕩白日哀后土六合忽怪事蛻龍挂茅宇老天鑿區區千
載護風雨

送葛居士住栖碧庵

越山巉巉越臺孤井中雙鯉曾走吳滿坡叢竹遺舊箭回首霸
業空煙蕪詩人訪古凌絕壁危樓竟欲老滾碧聲搖孤枕海濤
壯影伴瘦筇山月白了然道者亦離塵一龕松下分秋雲祇今
虎豹滿平陸鍊骨誰與箋青旻琴心劍氣雨寂寞醉墨淋漓風

雨落九十九峰歸夢寒玉笙冷冷跨飛鶴

荷珠

霞衣蔥珮來珊珊水晶之宮綠玉盤誰與馮夷作戲劇貝闕驅
入神瓢翻又疑罷織鮫人泣碧窪融作水銀汁圓或為璧方為
珪寒光滉漾不可拾古來欵器戒覆傾真宰之柄常惡盈李倫
買笑輕百斛金谷轉首迷榛荆紛紛魚目爭貴惜道眼獨懸諸
幻息須臾海濤山日高綠雲萬柄淨如拭

鄭宗仁會宿山中

宗仁樸翁也號初
心平陽焦下人

挑燈懷舊夢移席近春泉共話忽深夜相看非少年斗垂天未
樹燐出雨餘田亦有茅簷下飯牛人未眠

道中

程入江鄉宿新炊飯帶沙亂山愁外笛孤驛夢中家野水平菰

葉春風足棟花西來三兩客閒說舊京華

宿台州城外

荒驛丹丘路秋高酒易醒霜增孤月白江截亂峰青旅鴈如曾
識哀猿不可聽到家追此夕三十五郵亭

鄭氏西莊

不踏紅塵道結廬依水鄉遠峰開宿雨高樹表初陽犢卧野門
寂鴈飛秋稻香午橋花竹地回首已淒涼

溪竹

風高餘暑盡獨策興悠然野色延幽步秋聲入暮年日斜禽影
亂水落樹根縣回首故人遠城笳吹夕煙

仙壇寺西林

古壇仙鶴杳野鹿自成羣松氣浮清曉經聲出白雲石穿僧屋

過水到寺門分人世無窮事山中了不聞

寄鄭宗人

城南懷舊別谷口寄春耕野鶴巢雲老林僧管瀑清養花疏石髓煉藥伏山精見說孤燈雨年來著易成

葛嶺度宗賜賈似道新第於西湖葛嶺

不讀霍光傳炫然桃李門湖山變朝市烽火滿乾坤膽落水天騎魂飛瘴雨村春花吹秀麥誤國竟何言

京口月夕書懷

山風吹酒醒秋入夜燈涼萬事已華髮百年多異鄉遠城江氣白高樹月痕蒼忽憶凭樓處淮天鴈叫霜

宿七里灘

寥落空江上買魚開酒尊亂山含雪意孤艇寄楓根灘近不成

夢鴻飛欲斷魂偶呼黃帽語一犬吠前村

鹿城晚眺

古城仙鹿遠百感赴斜曛海氣千年聚山形九斗分神鴉饑啄蘚宰木蠹藏雲何處鳴鉦發春屯又易軍

初夏

春歸不知去處澗戶日初長舊篋題詩扇疎簾讀易香田蛙占水早海燕語興亡復恐閒愁起聽泉過石梁

過陶嶺有錢王井又三里有錢王石菴

沙井泉初試石菴苔已荒不知更宋代猶自說錢王古塚木根怪春山雲氣香詩成無紙筆駐馬語殘陽

客意

獨夜愁如此殊鄉老奈何故人經亂少歸夢入秋多衣敝鄰碁

宋元詩會 卷之五十五 九 鈔本
動書沈海鴈過燈前空拂劍酒薄不成歌

潘山長入括

為官轉多事行役到寒羶落日鄰州樹西風逆水船飯牛懷白石訪鶴入青田我欲看行卷仙峰雪瀑邊

答陳景賢

一劍挂寒壁艱危氣不衰鬢痕朝鏡覺書味夜燈知夢斷潮生枕愁新鴈入詩思君心欲折又負菊花期

薛得之之江東寄熊西玉諸公

乍逢還又別龍竹葛陂陰野水流春遠江雲入暮淡新知滿湖海遺老在山林解后如相問憑君道素心

古松

獨占寬閒地不知搖落天山林猶古色風雪自窮年龜伏靈根

壽禽巢絕頂僊秦封非所屑幾見海成田

崑巖

神斧何年鑿南山片石盤玉藏僊笥古翠落落縣門寒老木天邊瘦歸雲雨外殘市塵吹不到朝夕靜相看

桐角

田家無律呂聲寄始華桐碧卷春風老清吹野水空客心寒食後牛背夕陽中不惹林花恨年年送落紅

寶林寺

圖上追三笑詩中寄七哀孤樓非絕物多難亦成才歲儉米生竹春寒衣上苔不知遼海客化鶴幾時回

神仙寺訪僧

獨客無清伴高僧住別村空山卓錫影斷石繫舟痕風細松生

籟沙虛竹迸根小亭閒坐久落日嘯孤猿

趙與別業

已無湖海夢漸老足閒情野杖日尋壑家書時到城開池納天影種竹引秋聲亦愛簞瓢樂年來世味輕

夜意

澹然無一事至樂在書牀老石棲雲定疎松過雨香砧清秋巷迴燈白夜堂涼此意無人會重城醉夢鄉

天台隱者

俗駕不曾到瘦筇時復攜肺肝清澗飲鬢髮老巖棲野巷猶鷄犬春城自鼓鞞未應人世外別有武陵溪

新昌道上

江湖猶是客歲月已成翁僊路重雲外人家落木中山痕經燒

黑土脉入泉紅又得春風信孤花照驛東

越中送徐君寅歸閩

此地同為客當秋獨送君斜陽留薄醉遠道惜輕分老淚遺陵木鄉山出海雲天南有回雁音信倘相聞

故宮

驚風吹雨過歷歷古槐蹤王氣銷南渡僧坊聚北宗煙淡凝碧樹草沒景陽鐘愁見花輒月荒秋咽亂蛩

辟雍

冠帶百年夢昔遊今重嗟璧池春飲馬槐市暝藏鴉堂鼓晨昏寂廊碑風雨斜石經雖不火歲歲長苔花

孤山

回首咸平夢清風自滿湖乾坤一士隱身世此山孤鶴去空秋

影梅開向舊株耳孫今日白髮持酒酌寒蕪

舟次吳門

懷古心猶壯臨流影自孤湖煙迷構李城木出姑蘇草暗春驚
鹿菰香秋試鱸青樓舊時月無復聽吳歛

釣臺

曾來天上宿夢不離寒磯宇宙雙臺迴煙波一客歸姓增江郡
重暮隔越山微千古登臨意淒涼帶夕暉

過北鴈蕩山下

驛路入芙蓉秋高見早鴻蕩雲飛作雨海日射成虹一水通龍
穴諸峰盡佛宮如何靈運屐不到此山中

禹廟

萬國曾朝會羣山尚鬱盤嚴祠鎮玄壁故代守黃冠芝入雲根

古梁歸雨氣寒年年送春事來拂蘚碑看

荷錢

盈盈新疊碧難借柳條穿鑄景菰蒲外買隣鷗鷺邊炎官初掌
柄水國不書年漸長熏風價折筍供酒船

訪武伯山居

照書雙眼碧天欲壽斯文白髮前朝士青山半屋雲遲花春後
見遠瀑夜深聞迴首重華夢荒田自鹿麕

漁笛

楚竹聲何遠蒼茫想釣舟橫當半篷月吹破一江秋落葉紛前
浦驚鴻過別洲曲終枕蓑卧無夢到涼州

雪夜

開簾殘酒醒雪意尚垂夜色沈奎久春容變柳遲寒塘鷗自散

荒歲雀同餓便欲誅茅隱何山有紫芝

山中早行

短策穿幽徑山樵半掩扉月斜林影薄石盡水聲微一犬隔籬吠孤僧何處歸相逢松下立風露滿秋衣

溪亭

清秋有餘思日暮尚溪亭高樹月初白微風酒半醒獨行穿落葉閒坐數流螢何處漁歌起孤燈隔遠汀

獨夜

客鬢雙蓬老拾遺一燈明滅酒醒時百年回首忽成夢萬竅有聲皆是詩殘夜月枝烏未穩故鄉水草鴈多饑袂衣初試新霜冷欲折黃花寄所思

答周以農

平陽陸源人號稼村

一燈細語煮茶香雲影霏霏滿石牀萬里夢魂形獨在十年詩力鬢俱蒼山空絡緯悲秋雨水落蒹葭足夜霜未會漆園觀物意酒闌猶發次公狂

歸白石故廬

四鄰井竈出荒墟獨鶴歸來認舊廬一徑蒼苔供瘦策半簪華髮伴殘書斜陽巷陌語初燕新水池塘生細魚小立春風憐寂寞忽吹花片入襟裾

春暮

乾坤萬事上眉端寂歷東風獨倚欄白髮餘春能幾醉綠陰細雨不多寒香飄苔迳花誰惜影落沙泉鶴自看碧眼野僧知我意素琴攜就竹西彈

酬潘景玉

二首

喚起離愁落木聲抱饑猶自向書耕江湖有夢追前事天地無
根笑此生歲晏斷鴻寄客影夜深殘故人情幸來相就分岑寂
閒對梅花酌翠觥

讀史雙眸夜炯然一聲江鴈落燈前馬非汗血材終下木或青
黃性不全風月未容詩入務乾坤應許酒為年寒城日出無窮
事老耳山中獨聽泉

答柴主簿

閒采秋荷自製衣相逢舊雨語依依學窮科斗心空老夢跨蟾
蜍肉不飛幾喚江帆和鴈渡長歌巖戶見雲歸何須化鶴千年
後城郭人民半已非

答鄭即翁

初陽蒙霧出林遲貧病雖兼氣不衰老愛歸田追靖節狂思入
海訪安期春風門巷楊花後舊國山河杜宇時一種閒愁無著
處酒醒重讀寄來詩

雲間懷古

熏風短櫂水鄰鄰老鶴疎林寂不聞內史祠荒殘碣雨黃門書
冷牛堆雲獵場斜日分桑塢馳道深秋走鹿羣寥落一觴誰弔
古漁鄉煙景客平分

過吳門感前遊

回首前遊夢未忘江雲漠漠樹蒼蒼客心空老鶯花月詩貌不
肥魚稻鄉白虎氣銷遺瘦石綵虹影冷卧斜陽當時已嘆來麋
鹿後二千年更斷腸

元日得家書

爆竹聲殘事事新獨憐臨鏡尚儒巾寒窗琴冊燈花曉衰鬢江

湖栢酒春道在老天扶客健書來稚子識家貧舊山亦有閒風
月歸與漁樵作主人

次翁秀峰

花柳湖西別此翁十年鬢雪忽重逢唐陵愁問永和帖楚水夢
聞長樂鐘黃奴秋燈餘舊癖素侯野服拜新封世情雲雨何時
了千古青青太玉峰

寄七星人

七星山平陽州北五里鄭初心先生隱其中

十年疎鬢為誰斑天借儒冠日月閒欹枕寒生雙瀑竹澗開門
春滿七星山鶴歸尚覺遼城是鴟老空聞蜀道難欲覓九還憑寄
語青牛何日度函關

和王德游夜感

小池荷淨雨初晴世念消磨未到僧衣帶長江空北固觚稜舊

月隔西興一春空負花前酒獨夜相知竹下燈自笑老來甘鷓
退少年雲路健追鷓

酬合沙徐君寅

合沙福州郡稱

歸鶴悠悠渡海遲閒來野寺看僧碁鄉風心荔子熏風國客路
槐花細雨時天地一身愁自語江湖諸老淡相知烏絲醉後淋漓
墨片月涓涓照硯池

立秋日作

苦熱如焚想雪山清山商一夢破愁顏炎光斷雨殘虹外涼意平
蕪遠樹間忙踏槐花猶入夢老催蒲扇共投閒城頭遙望纍纍
塚遼海荒寒鶴未還

王監簿南墅新樓落成

玉珮珊珊不可招眼空塵界等秋毫山林貞白三層迴湖海元

龍百尺高自笑行藏閑氣數肯將歌舞換風騷卷簾最愛南山
近坐聽松聲起碧濤

訪僧鄰菴次韻

拂石題詩滿袖嵐尋僧又過竹溪南乾坤浩蕩酒鄉寄山水蒼
寒琴意參老燕未歸同是客孤雲無住孰為菴寂寥午夜松風
響疑是神仙接塵談

新晴偶出

琴牀茶鼎淡相依偶為尋僧出竹扇扉風動松枝山鶻語雪消
菜甲野蟲飛看花春入桄榔杖聽瀑寒生薜荔衣古寺無人雲
漠漠溪竹行喚得小船歸

雲門即事

最愛林中過客稀坐分片石淡忘歸僧閒時與雲來往鶴老不
知城是非瀟洒山光秋入畫清寒花氣曉侵衣一溪截斷紅塵
影西有任公舊釣磯

寄林編修名千之平陽人

大雅凋零尚此翁醉鄉一笑寄無功衣冠洛社浮雲散弓劍橋
山落照空東魯有書藏古壁西湖無樹挽春風巾車莫過青華
北城角吹笳送暮鴻

喜劉邦瑞遷居采芹坊

并鄉聚散笑息息歲月無情忽兩翁燈火城南聽夜雨桑麻社
曲憶春風百花新意皆歸燕萬里離愁獨寄鴻重約扁舟尋禹
穴夕陽疎樹亂雲東

讀秦紀

瑯琊臺上晚雲平虎視眈眈隘八紘萬里不知人半死三山空

覺草長生兆來鬼壁沙丘近威動神鞭海石驚書外有書焚不
盡一編紀上漢功名

項羽里

英雄蓋世竟何為故里淒涼越水涯百二勢傾爭逐鹿八千兵
散獨乘騅計疎白璧孤臣淚落烏江後騎追遺廟荒林人酌
醉至今春草舞虞姬

陪王監簿宴廣寒遊次韻

銀橋疑駕海天長丹粟離離照翠觴影浸山河瓊殿冷舞深風
露羽衣香亦知廣莫元無野却笑溫柔別有鄉手折一枝驚昨
夢素娥憐老授玄霜

漁舍觀梅

冷雲漠漠護籬陰瀟灑苔枝出竹林影落寒磯和雪釣香浮老
瓦帶春斟幾憑水驛傳芳信祇許泮沙鷗識素心回首西湖千
樹遠扁舟寂寞夢中尋

虎丘寺

突兀僧房倚翠微金精幻虎霸圖非瓊田萬頃山如湧鐵壁千
尋澗自飛堂在經聲通老石樓開塔影落秋衣十年幽獨嗟誰
氏斷刻苔深帶夕暉

鶴林寺

流水蒼松石迳斜甕城城外梵王家僊林不返雲巢鶴僧鉢曾
移海國花剝落苔碑秋卧草荒涼竹院午敲茶當時一擲乾坤
手曾向山窗倚暮霞

焦山寺

山裏中流水作林寶蓮鼇背翠沈沈半空但覺煙嵐合三面不

知風浪濶僊井浴丹開曉日海門浮玉澹秋陰洞深瑤草無人
采瘞鶴殘碑浸碧潯

寄葛秋巖

吳地繁華半劫灰故山秋遠夢頻回琵琶亭老春風擢桑落洲
寒夜雨杯歲月悠悠人幾換關河渺渺雁空來酒酣欲寄登臨
眼黃葉斜陽滿廢臺

用韻寄陳振先同舍

心事淒涼寄雁聲石田苔滿未妨耕西風戍角催年換殘夜江
樓見日生者茗敲冰貧有味看花隔霧老無情湖山猶憶笙歌
底笑領春香綠滿觥

贈天目吳君實

詩興翩翩度雪溪巖雲半護舊留題夢回殘月蒼梧曉家在春
風秀麥西萱草堂深衣屨寄桃花觀冷酒重攜故山石鏡無人
問空與寒猿照影啼

東山渡次胡汲古韻

客來持酒灑煙霏空想風意欲飛老洞藏雲安石卧孤舟載雪
子猷歸一川白鳥自來去千古青山無是非欲上危亭愁遠眺
廢陵殘樹隔斜暉

家則堂先生生還

瀕死孤臣雪滿顛冰瓊鬢盡偶生全衣冠萬里風塵老名節千
年日月懸清唳秋荒遼海鶴古魂春老蜀山鷓歸來親舊驚相
問未黍離離夕照邊

題陸大參秀夫廣陵牡丹詩卷後

南海英魂叫不醒舊題重展墨香凝當時京洛花無主猶有春

風寄廣陵

歸自越避寇海濱寒食不得祭掃

持酒無因洒墓松禽聲花色慘東風去年此日身為客及到家山又客中

山窗新糊有故朝封事彙閱之有感

偶伴孤雲宿嶺東四山欲雪地爐紅何人一紙防秋疏却與山窗障北風

蘇小小墓錢塘名倡有墓在嘉興縣西南六十步

歌扇風流憶舊家一丘落月幾啼鴉芳魂不冑為黃土猶幻燕支半樹花

夢中作四首

按景熙既造石函瘞宋諸陵骸骨於越山樹冬青識之作冬青花詩矣而復繫之以絕句當時不敢明言但託為夢中作然此四首據盱江鄧元錫定為唐珣之詩考唐珣與鄭宗仁皆景熙一時同志

圖蘇義舉者唐既別有冬青花古體二章而絕句聲調與景熙近且又原載林集內則此詩仍當屬林恐盱江未之深考也

珠亡忽震蛟龍睡軒敞寧忘犬馬情親拾寒瓊出幽草四山風雨鬼神驚

一杯坏自築珠丘土雙匣猶傳竺國經獨有春風知此意年年杜宇泣冬青

昭陵玉匣走天涯金粟堆前幾暮鴉水到蘭亭轉嗚咽不知真帖落誰家

珠鳧玉鴈又成埃斑竹臨江首重回猶憶年時寒食祭天家一騎捧香來

葛仙翁石林

鈞天夢破珊瑚枕巖壑春供翡翠屏一卷黃庭雲半席宵深讀

與嶺猿聽

館娃宮

苧羅山女入宮新四壁黃金一笑春步輦醉歸香逕月隔江還
有卧薪人

聞蟬 二首

翼綃微動自宮商幾曳殘聲送夕陽喚得槐柯芳夢覺熏風一
曲換西涼

近交紙薄雲翻手舊夢冠空雪滿顛却憶画船曾聽處夕陽高
柳斷橋邊

夢回

夢回荒館月籠秋何處礎聲喚客愁深夜無風蓮葉響水寒更
有未眠鷗

牟 嶽

字陵陽原蜀人僑居吳興父諱子才謚清忠以直道事理
宗為名臣嶽官大理少解於度宗朝即退居不出其子應
隆字伯成咸淳丁未進士宋亡元大 臣招之不應後起為
上元主簿輒致仕父子皆嗜學嶽妻 鄧夫人李心傳外孫
也

九日和陶

翁媪兩白髮蕭然老江干大兒荆溪遊折腰豈為官諸兒走異
縣亦各營一餐別多會面少端復坐饑寒諸幼且眼前笑語開
我顏勿問賢與愚懷抱俱相関

送婁伯高遊吳

桃花水暖清明前長隄柳色青如煙男兒年少重意氣春風買
醉吳江船西湖三月春更好笙歌錦繡神仙島紫燕樓深翠黛
閒碧羅天净楊花老興亡往事置勿論千金不惜酬歌樽酒酣

莫作後庭曲遊人思斷江南魂去去知君訪陳跡吳水吳山青
歷歷花殘鈿碎館娃空春草年年為誰碧君行正樂我為愁白
髮送君思舊遊平生漫浪無似我努力功名須黑頭

和趙君實宣慰

平生知我一季及別後牢閉白版扉偶有客來孤鶴起也無人
覺小舟歸從教俗子頻相惱只恐仙禽未肯飛莫怪近來書問
絕醉眠林下兩忘機

方逢辰

號蛟峰浙人宋亡高隱不赴徵召與何潛齋倡
和山水間其猩猩篇雞雛吟極為潛齋所賞

送潘翠谷

無屋住僧廬無菜挑野草野草風味長僧廬人跡少剝剝誰扣
扃訪予事幽討錢塘有騷翁自號翠谷老匹馬遊南牆要伴松

竹好遐思到山人迂尋出詩藁詩無愁苦吟掃退郊與島胸次
鮑明遠筆下王逸少我觀陰與陽禪代何時了不能為魯連尚
可作商皓長歌黍篇醉酌酒問曷曷

猩猩歌

獵者圍猩猩疑其以衆抗誘曰不取小惟取大與壯衆猩自相
仇推擠送其長以次索二三不復推已往四五至于十無一得
釋放衆猩怒相目各悔受人誑及早同一心未必軀盡喪吁嗟
獸不靈相仇無足嗔胡為豪傑羣不能自相親秦人吞六國諸
侯各附秦併力取其一冀不及他人智者欲合從徒自腐舌辱
安得先震鄰然後于其身彼先噬其一其次禍亦均早知秦用
術六國同一心

按此篇與雞雛吟最為世所傳誦但雞
雛之作借談良知不免近腐故刪之

題盧文峰十二知丞文集

驪珠一顆千仞淵漁翁探得遭驪眠一朝吹墮千萬顆恐是蛟
驪卧半天駢花儷葉妙天下文賦直追古班馬手抉河漢裂錦
章寫在詩歌軋騷雅大篇赤手補長蛇不須控勒騎生駟短篇
任意起忽伏蒼江浩浩濤中差文章妙手壓場屋到底三芋還
得鹿廬陵方買載月舟清談又展朝天軸軍將打門書一封呼
起醉夢為醒鬆只怕至寶不肯留山中雷霆風雨取去還蛟龍

田父吟

清溪眇如斗大邑萬山壁立土磽瘠百分地無一分田九十九
分如劔脊一畝之地高復低節節級級如橫梯畝心一畦可一
畝邊旁一畝分數畦大家有田僅百畝三二十畝十八九父母
夫妻子婦孫一奴一婢成九口一口日噉米二升茗齏醢醬菜
與薪共來日費二三斗尚有輪官七八分小民有田不滿十鎌

方放手有菜色曹胥鄉首冬夏臨催科差役星火急年年上熟
猶皺眉一年不熟家家饑山中風土多食糜兩兒只有肯育一
兒只緣人窮怕餓死可悲可弔又如此有司猶曰汝富民手執
鞭鼓目怒視今年淫雨天作難洶湧澎湃四五番浮尸斃屋壞
江下迸山裂地如鯨奔半山都成水澤國平地皆作龍蛇窟水
頭晚退早復來屋角朝出夕又沒巋然令丞簿尉衙下視四境
無人家水平歸家無屋住者無生涯農民拋家認畝隴擔砂翻
石肩皆腫百千一畝判晚秧一坵分作兩坵種都來一畝無百
千買秧已費半百錢眼前插種已剗肉向後豐歉猶在天晚田
再種未可保早田無秧為出草皂衣旦暮來槌門今年苗稅催
須早打快織機起頭綱作急糴米輸苗倉更有一言牢記取斷
不許人言灾荒

題吳氏梅堂

聞君家在雪邊住，靠盡欄干索盡詩。只怕梅花應冷笑，清香元不要人知。

宋元詩會卷之五十六

皖桐陳焯默公輯選

後學程仕松皋叅較

谷音集

王澹字元佐遼東人

澹博學醇行博州刺史迎為師表教授弟子百餘金貞祐中就拜宣撫遼東宰相累書請澹之鎮澹不應浮海遯去

河之坊矣

河之坊矣截截其平豈曰不力言持其盈國慨覆矣視爾夢夢云胡昊天不終惠我生云胡昊天疾威堂堂輾轉翫日四國卒荒偃仰在位不知匪臧不顧其行有粟有粟亦集于缶則不敢饘抑餉余口諄曰哲矣孰秉其咎知我慢慢不知我疾陟彼南山石其扁矣戒爾勿傷足其趼矣啗啗昏昏顏之醜矣倚余何言涕之泣矣民之種種具曰贅疣弗於爾躬曷云能瘳勗哉天

子保爾有位慎爾為猶

感遇 四首

迅景走北陸高木交朔風衆情悅妖冶豈云惠其終萬事無不
 有流轉大化中古來論成敗咄咄魚為龍牛車竄下國勢異情
 則同蒲姚本狙擊桓桓湯武功彼美三三子一笑清醕空
 兩虎鬪中野利乃歸衡虞血肉相蹂躪鼓吹行通衢獨倚剛脊
 力箕踞傾百壺未必非禍福凡百持爾軀吾聞畏虎羆吹竹不
 枝梧

光風蕩繁囿丹綠綴柔柯遊子去萬里空閨歛翠蛾行雲落江
 水酒盡不成歌雞飛與狗走妾命獨奈何

槁梧蒙絃冕崢嶸化侯王餐餌先百牢蘭煙浮玉房兒女何所
 見拜跪色甚莊四海正聾聾瞽威靈爾翕張哀哉杞梓村棄捐

官道傍

贈段十

相識風塵下斯文伯仲間騎驢逢聖日捫虱對秋山忠信偏成
 拙支離最得閒秦川貴公子早計失荆蠻

程自修 字忘吾洛陽人

自修性孝友讀書城東門翰林元裕之上
 其言行除禮部郎中自修聞之棄家南去

獨坐

終南在吾目秋色遠接應誰招天外翠來作窗中靚娟娟初畫
 眉盈盈獨臨鏡雲去物象空月出心源瑩我欲往從之有客誇
 捷往洗耳復洗耳松風入清聽

歲云暮矣

歲云暮矣百工休獨持千古供素遊丈夫磊落如天日促促胡

為升斗謀望塵下拜乃東市山中茹芝可白頭嗚呼此道棄如
土眼中歷歷聖賢靈鄉里小兒紇那歌前輩先生八風舞欲挽
東流無萬牛抱膝長吟聽更雨

痛哭

日射石虬鱗甲開草色又換青春回精靈聚散豈拘束山鬼叫
呼松栢哀當時沸天簫鼓動今日悲風陵上來息息今古誠傳
舍人生有情淚如把乾坤誤落腐儒手但遣空言當汗馬西晉
風流絕可愁悵望千秋共瀟灑

王猛墓

男兒有才須有識死葬荒陲真可惜君不見渴虎不飲盜泉水
始吾虞君今已矣

歸龍門

來往空書札行藏但布衣直為知己用可惜轉頭非歲月百憂
集江山一笑歸禰生狂到死君子要知幾

出城

束帶供人事扶藜強病身誅求非上意盜賊本良民涇翠山藏
雨輕黃柳帶春小兒隨白首行坐各沾巾

送元吉歸河東

獨憐風格困塵埃敢料天涯共酒杯花鳥偏于前輩好江山更
有後人哀顏回盜跖終歸命諸葛曹丕豈論才正自別離愁未
透更教柳色帶青來

冉

琇字温季瑯琊人

琇好縱橫談業漁獵世為李氏客難且作琇累書
止之不聽乃南走渡江聞壇城東向三哭伏劍

過臺

遊目過臺上煙色秋暖隲當時駐文輿君臣良宴會歌鐘正喧
喧華纓接飛蓋行樂遽未央已見顏色改爽鳩馬可知齊景尚
何在世運如日月朝夕還相代

秦吉了

有鳥秦吉了鳴聲一何悲自言承主恩十載供提攜雕籠閒羽
翼繫之雙華絲一朝不終惠零落投荒彝自傷去中土豈不懷
南枝誠堪利主家生死不敢辭努力萬里風寄此長想思

蓬萊閣

倚闌吟不就看劍老相催鳥逐孤雲沒帆從別國回魯連惟有
死王祭不勝哀為問依依柳秋聲何處來

海州

波濤起天末舟楫滿城隅管晏非王佐田韓有霸圖何門堪跋

履吾道欲乘桴倚杖春風近含愁向綠蕪

宿京口

推篷在京口山色對秋眠搔首半帆落懷人孤月懸形骸成獨
往風物媿流年隨處逃名姓烏啼又發船

獨立

獨立春將晚周遊道正窮江山千古後形影百年中士論元無
的人生各有終臨危負知己淚落海雲東

元吉

字文中河東人

吉太原大俠也報仇市上吏來捕更殺吏走太行谷中會
赦歸乃絕嘗與遊者三年通左氏史記家益貧入元甲子
從戎開
平道卒

自葫蘆河至居庸關

男兒不成名命也負羈絏投袂出門去浩蕩破邊色飛沙白盪

胸落葉黃沒膝微陽割層嶼山骨緊格格抉眼已崢嶸置身何
 突兀健鵬勢欲落老馬志亦屈氣岸勇枝梧脈絡大包括物候
 秋冬交土風中外隔懷歸畏簡書欲往投鬼蜮無言答酸楚有
 血灑寥閭古來喪亂中天地坐跼踏形骸盡則已烈士裹馬革

上黨

怒山出老拳寒色頑巖巖城根挿沙水斗絕虎相視憶昔宣武
 兵最強合圍步驟如搯吭那知一叱立破散誰道亞子口尚黃
 嗚呼皇天肯悔禍豈有盜賊稱天王要留千古論曲直故壘依
 稀榆葉赤

陪翟三遊平州東城

老境逢春色平州聚德星不堪歌勅勒并欲案丁零雪泥殘年
 白山呈太古青殊方更分手暮角若為聽

早發博州

落落空城在蕭蕭獨客歸古今殊未了心迹每相違魏國山河
 羨唐家節度非偷生慚宿鳥霜月上征衣

夜坐

森森夜氣落寒欄閒把離騷酒正酣忽憶梅花不成語夢中風
 雪在江南

孟鯁

字介甫曲阜人

鯁沈毅雄略歲癸亥山東兵欲起劫鯁計事甲者三至鯁不肯遂遇害

徐州

徐州壓城霜木赭可能回首風塵下當年縞素從西來仰天伏
 地聲嗚啞君臣大義日月白牧馬鳴條此其亞帝王氣象佳蔥
 蔥舉止却類田舍翁美人瓊玉是糞土四海正在水火中如龍

如虎尚蹉跌况乃豎子貪天功

猛虎

猛虎被束縛皮肉不相保人生到錯迕天地亦草草古來割據
何代無可憐百萬殉匹夫漁陽突騎如風火青州城門鐵作樞
丈夫好在識時務座上赤龍公莫舞沙海荒荒魂不歸莫說青
州淚如雨

南京

惛惛坊陌傍潏春活活溪流雨過痕花鳥幾時充貢賦牛羊今
日上丘原猶傳柳七工詞翰不見朱三子孫我亦前生梁楚士
獨持心事過夷門

折花怨

息息杯酒又天涯晴日墻東叫賣花可惜同生不同死却隨春

色去誰家

安如山 字汝止廣漢人

如山善擊劔左右射讀經史百氏之書端平甲午安撫曹
友聞辟掌書記不起友聞戰死三泉如山往收其骨藏諸
其先人之側乃
東下老于會稽

曹將軍

將軍精悍姿齒齒碎鐵石在昔童稚中但聞飽經術縱橫騁柔
翰丹雘間金碧有司塞明詔敝邑屈詞伯芹香春水生冠玉侍
童席脫略章句陋搜抉窮理窟未及文化成其如王土窄丈夫
報主願豈必蒙清秩蒼皇請去位滿面秋栗烈糾合熊虎羣旌
旆揚廣陌正當摩厲間一鼓拔勅敵屯兵沔水源千里斧截截
浩蕩排煙旻西極安嶽岫奈何國無人腐儒秉旄鉞賞予入私
門金湯授盜賊公時奮臂爭反遭獻玉剛三軍視馬首慟哭下

天壁功成坐齟齬憤怒鬚插戟中宵拔劍起肅肅整勁翮吐氣
 風雲生塞旂陷堅列貫穿死生地蹠血天地黑勢雖眾寡懸形
 未雌雄決路窮斷首尾眾盡乃手格豈知龍虎逝黯淡山川色
 百萬尚震驚嗚呼死諸葛長城但自壞千古痛稠結肉食無遠
 謀野史有直筆酒酣歌節士晶晶霜日白

下瞿塘

去去如奔馬來來無盡船人心似江水日夜向吳天

王翥字一飛成都人

翥篤學尚氣吳曦謀反來請翥翥陽病風瘡
 潛往安丙謀誅曦事定匿巴中為農終身

灌口秋漲

所向愁無地窮源欲上天蛟龍胡爾怒鷗鷺更誰憐萬里朝宗
 意羣克跋扈年生涯秋色裏獨立問漁船

憶舍弟

藥物吾仍病花時汝未歸不眠愁月落獨立看雲飛詩禮自持
 律飢寒誰解圍遙知理舟楫西望涕沾衣

浮世

浮世惟高枕平生有敝裘江花中酒日巴雨落帆秋老矣英雄
 事愚哉盜賊謀啼猿長自在一笑下滄洲

吳宣撫故宅

社稷疲奔命乾坤服至誠扶持三蜀在出入兩朝榮豚犬有遺
 恨麒麟空復情家聲墮已盡國法用猶輕成季翻無後花鄉浪
 得名門庭黃鳥語几杖綠苔生威福何偏重精神恐不平庶幾
 蒙世美凡百慎持盈

送張判官歸巴州

回首三巴曲平生萬里橋衣冠無賴客花月可憐宵

師 嚴 字道立襄陽人

嚴讀書識大義善禦射自園中拔身走行在所上書論事不報拂衣去客死武陵

大閱

長江天險設荊州國西門幕前仗斧鉞赫赫齊晉尊熊羆在掌
握百萬不敢喧固列厓嶠立動色虹蜺翻雖云口口口亦是明
主恩高秋鼓角壯慘淡傷精魂山南正困危血肉連川原由來
多壘辱豈不在大藩既同事王室於義如弟昆勗哉從簡書卹
鄰古所敦

蘭五見訪

漢陰美人青兕裘獨騎瘦馬尋荒丘花前下馬迎一笑珠玉在
側形骸羞酒酣散髮箕踞坐錦帶爛熳懸吳鉤斷蛟刺虎好身
手碧瞳如水涵清秋惜哉科目大脫略壯士豈為章句囚中原
格鬪困不已江波木落寒悠悠

渡江

鹿門山人滄浪客灑淚已枯眼見骨風塵崢嶸萬里空不知何
處營三窟城中性命湯火近路窮援斷無消息鼠竊狗偷何足
憂都將十指漫天日大言濶步好公鄉三百年餘涵養成已聞
鄭五但搔首復道龐涓豎子名平時肉食誇果決誰信臨危跋
躄行白頭面皺牙齒落萬事已矣秋風生

庚午三月五日朱尚書席上醉歌

天風浩蕩何處來荆南府中好春酒我公此日盛賓佐但飲無
勞問升斗座中十萬無下著烏帽朱衣馬牛走妙舞清歌如有
神翠爛金明各回首人生行樂須壯年小人再拜為主壽滿堂

淚落起挽鬚臨饋三歎成鬱紆干戈未定郡國破亂臣賊子何
代無主憂臣辱坐感激忍對化鳥調歡娛近聞士卒願一戰猛
氣正倚風塵麓丈夫行事動千古快意一飽非雄圖

武陵客居

浩蕩千年調飢寒八尺身不愁逢魍魎可笑繫麒麟殘雪江村
路空山澗水春時危終遠去道在豈全貧

公安早發

去國秦公子窮途阮步兵別離如昨日豪俠異平生江月為誰
好巴船何處行高秋伴搖落早落若為情

張琰 字汝玉廣陵人

琰身七尺長鬚個儻有節梁補州牙兵隨制置李庭芝
潰圍南赴行在所追者及之麾下鳥獸散琰獨開死

出塞曲 四首

腰間挿雄劍中夜龍虎吼平明登前途萬里不回首男兒當野
死豈為印如斗忠誠表壯節燦爛千古後
朝發山陽去莫宿清水頭上馬左右射捷下如獼猴先發服勇
決手提血鬪驪兵家互勝負凡百慎前籌
驅馬飲淮水千里黃草平種穀卻流血痛哭秋風生寡妻出租
稅孤兒荷戈行武威既不足願見和親成
軍中日奏凱鼓行遼海東當宁怡玉色千金勞成功焉知昨日
地袒甲去如空邊人不敢語將軍益褒崇

官柳

不見橋東黃布帘樹猶如此我何堪裊裊亭亭忒無賴又將春
色誤江南

汪涯 字萬頃漢陽人

涯家貧事母孝宣撫賈似道請為客當作露布獻捷涯瞋目日啗人以利而退其師又兇弄主上似道大怒搃殺之其母曰汝以直死我則不辱可以下報先君矣亦自沈

采石獨酌

欲落不落月在手百年幾何持釣綸不知春色萬象表綠煙漠漠入江濱天翻地覆有今日酒熟詩温無可人向來談笑成黄土墮淚未了雞司晨

江帆

江帆去去可腸斷千古萬古越王臺掃空黃葉晚風定飛盡碧天晴鳥回半生無成坐筆硯萬事不理問樽壘年年看梅今白首已矣英雄留七哀

江行

江陵白魚如斫玉挂席獨去風日寒封題兩甕寄白髮兕涯不

是作魚宮

秋光蕩漾滿行色鄰舟吹笛不堪聞洞庭濯足一尊酒夫君不來空白雲

詹本字道生建安人

本温言正行丞相江萬里薦為郎先致書本本方坐門前石上釣使者至問本居本不答即持竿渡溪去不知所終

春日攜客遊武彞

山脚健枝梧百里插蒼峭粼粼石可把曙色坐遠釣風木真筓竿歷落太古調衣冠帶莽蒼山鬼驚二妙雲月正忘年花鳥更索笑迴船翠凌亂吾道付長嘯

宿天台

風泉隔西屋獨夜寒自生開窗失山色白雲壓前楹累盡得瀟灑去住俱不驚鼻息叅僧鍾霜露入殘更

閒中

萬事問不知山中一樽酒埽石坐松風綠陰滿巾袖

皇甫明子 字東生四明人

明子性豪宕乘小舟挂布帆載琴尊書籍釣具往來江湖入元丙子發狂痛哭蹈海

海口

窮島迷孤青颶風盪頑寒不知是海口萬里空波瀾蛟龍持幽沈怒氣雄屈蟠崢嶸挾秋陰挂席潮如山熒惑表南紀天去何時還雲旂方慘澹腰下青琅玕誰能居甬東一死諒非難嗚呼朝宗意會見桑土乾

京口行

京口兵可用酒可飲一語參差族成血忠賊相持各凜凜豈知好醜隔形骸父為孔鸞子為鳩人象天地定理則那遺臭流芳

且高枕

水國

水國淒涼住秋宵爛熳眠歸雲猶帶雨墮月忽明船社稷資長奠髭鬚近暮年亂離棲不定百口託浮田

丁 開 字復見長沙人

開負氣敢言安撫向士璧被問開獨詣闕上疏具陳士璧功大軍府小費不宜推究書奏羈營揚州歲餘卒

漂泊岳陽遇張中行因汎舟洞庭晚宿君山聯句

元氣無根株 開 地脈有斷絕 行 中 日月互吞吐 開 雲霧自生滅 行 中

楚妃結幽想 開 巴客答清映 行 中 寧知莽蒼中不假巨鼇力勢閱

南紀浮 開 思隨西風發形影寄孤舟 行 中 吾道成馱舌笑談正凌

傲 開 俯仰不偏側每與景物會 行 中 未省歡娛畢疊翠晚悒悒 開

墮黃秋 的 的 魚龍負翮 行 中 獨鳥去不息曠原眇周抱 開 異境

超恍惚徑度萬頃空行中忽得一拳碧稍稍雞犬近開依依鍾梵

夕推門月微墮行者茗香初歇衣裳識霜信開瓶鉢了禪悅事

定心源清行中夢回斗柄直周遊興欲盡開長往計未決出門更

回首行中沙水盪虛白美哉神禹功開已矣三苗國山川長不朽

行愚智俱可惜神交正冥冥開指點空歷歷慎勿語俗人行中桃

源恐相失開

可惜

日者今何及天何有不平功高人共嫉事定我當烹父老俱鳴咽天王本聖明不愁罹黨禍攜淚向孤城

揚州歲莫

萬國春回日層城晚眺餘江聲隔吳楚原色到邳徐大閱軍各壯狂歌客禮疎百年寒荻裏風雨憶吾廬

建業

誰遣淒涼滿眼中黃花渺渺又秋風龍蹲虎踞江山大馬去牛來社稷空縱有千人惟諾諾本無百歲更息息乾坤顛倒孤舟在聊復殘生伴釣翁

鮑字以行括蒼人

輓嗜酒授簡萬言教授得錢悉送酒家遇客盡飲乃去晚益傲誕衲衣髻結遊青城不返

天馬

天馬抱奇相緊骨瞳方明出入百萬中有如一鳥輕宇宙莽超踏風雲慘經營獨倚雄傑態蕭蕭隨北征朝飲南海頭夕秣乃幽并失主坐黯淡別羣奮長鳴豈無輕俠兒金羈懸朱纓但感東帛義不忍負死生低頭為君老喑喑萬里情

襄陽行

今日何日春氣柔東城騎馬花綢繆為君停馬一呼酒花前倒
披紫綺裘玉脂汎濫魚鳥飲歌舞倦矣蛾眉愁千金萬壽好賓
主全我不樂歲如流豈比世上狂馳子一語不合行掉頭嗚呼
天倫古所定非有大故寧相尤

重到錢塘五首

生死雙飛正可憐若為白髮上征船未應分手江南去更有春
光七十年

無賴山光疊疊青玉魚金盃早飄零冷思禹穴真竒事千古衣
冠託杳冥

萬家歌舞送浮生曾有涓埃答太平猿鶴沙蟲天始定不須辛
苦怨南征

聞道淡春雪打圍誰憐身上藕絲衣莫憂白壁成塵土解逐南

風萬里歸

惟有寒潮不世情朝朝莫莫過空城百年車馬閭門外獨獨春
風草又生

崔 璆 字子玉京口人

璆美風儀善談論晚病狂攜大瓢貯酒行市拍
掌歌笑未死十日自表石曰醉鄉伯崔璆之墓

攜錢鉞汎江

酒星落江口化為崔子玉孤舟載壺觴水花紅映肉小兒唱銅
斗大兒倒醺醖一笑不知年浩蕩天地屋慎勿臨竇呼人生隨
轉燭嗣宗禮法仇鐘會被殺戮

咄咄

咄咄復咄咄小兒成老翁么微各形色追琢元化工不知春風
去又見千綠叢主人羨客懷載酒行溪東一步一回首十步尊

已空靈均與太白醒醉同所終願見化蟻蠓生死託壺中

今日一何好

今日一何好花下醉狼籍醉中有奇事夢見生八翼浩蕩排虛空靈君好顏色朱衣持大篆授我醉鄉伯頓首玉墀下臣璆才蟣蝨封此柳何功請陳愚頑臆臣家京口東門前大江碧臣願駕長風吹作酒萬石萬象各千鐘拍拍大庭國推枕在山中紙衾霜曉月

魚 潛 字德昭姑孰人

潛敦重和易推分澹泊不忤於物所居環堵埽地焚香彈琴讀書養鸞鴨百頭以給食終八十餘

古意 二首

青青陵上柏落落勁不摧人生百年內朝夕變所懷斗酒命同好萬里不顧回聞有昌國君談笑黃金臺柔言更長跪信是富

貴媒但恐氣習移今古不同才寄言去國者歲晚有餘哀

權衡豈公平天駟但伏櫪東井不救湯倉庫何時寔元工冒假借名器其可惜如何萬萬古不行督責術

楊白花

楊白花誰教度簾幙搖蕩春風能幾何不比無情自漂泊人生祇合作支離長秋鷓啼江水落

送鄭秘書南歸

垂老乃如此憑高俱惘然空能正幾字好去作千年童子歌鶴鶴幽人拜杜鵑江花獨爛熳春去得誰憐

聽歌

行雲流水出名姝酒盡花前雙玉壺此曲江南都忘却春風轉調小口于

柯芝 字士先端陽人

芝早通五經善詞賦又詣行在所見章祕書求讀書省中益通諸家教授生徒著書百餘卷子茂謙

耳耳

耳耳非佳語陸陸難為顏我生胡不淑多戚長鱗鮮歡搖落復已綠春風滿江干 靈起予興欲言骨肉酸園桑摧為薪桃李亦半殘翹堯企晴燠九室十更寒飛錢如美色乃入貴者闌丘閭有穀賣窮欄朝無餽不售信成隱徒手良抱歎宛轉愒餘息溝壑分寸間吾輩正不免遑暇卹彼瘵

餘髮

餘髮蕭蕭白垂領十年一拙門庭冷來頻沙鳥頗相識起晚鄰雞已三請形骸拄樹豈復好心緒如蓬不能整平生幾緡空馭駝老老去一盃先酩酊俗言祇虞方鑿迓人事但愜幽居屏聖賢未必盡芻狗天地何堪共鼃黽若為苴履曾足芥幸不柳衫真欲瘦一聲樵響何處來獨立看雲發潑省

橫江

橫江一片碧攜鶴上漁船收綸不成下却抱釣竿眠

柯茂謙 字退子

魯港

十年回首付霑襟斷甲沈沙齒齒潑可惜使船如使馬不聞聲鼓但聲金人歌鬼哭都堪歎木落江空正獨吟遺老蕭條漸無語酒旂颯颯出蘆林

江行早發

陶鑄煮孤影寒燈沸青花水開數江樹月落失人家

邵定 字中立廬陵人

定溫粹博雅通周易春秋宅邊植梅竹蘭桂蓮菊各十餘本澗衣大帶婆婆其間自稱六鄰老人

山中

白日看雲坐清秋對雨眠眉頭無一事筆下有千年

漁家

漁家臨水住春盡無花開年年謝流水流得好花來

熊與和 字天樂豫章人

與和性介澹無妻不食肉通經史百氏之書布衣草屨遨遊諸名山尤嗜彈琴草書

木平飼龍亭次韻方巨山

耳見何何如得眼聞山根磅礴極初分浮漚起滅自潭影大地晴陰空嶺雲何處老人來聽講他年少府有移文由來清調須吾輩幸不山王愧五君

唐玄宗鐵像

巍冠攢壘碧雲花坐閱山中幾歲華莫把金丹輕點化正愁生死困安家

晏 字明祭宜春人

又風度秀整主趙崇灘後灘逮繫又自請詣獄俱以瘐死

夢中

春樹年年少寒雲浦浦連片帆高浪起斗酒夕陽偏沙市懷司馬州城哭老邊太平冠蓋盡爾敢望諸賢

訪吳

平生一語不肯吐浩然披髮行西林羨人十日跨驢出黃葉堆門雲雪淡

孫 字器之大庾人

璉家貧益嗜書不應選舉躬耕織屨以食終百歲

述懷二首

少也不諧俗老去益美閒百草生已綠春雨滿南山朝朝荷鋤
去既夕驅牛還生長茆簷下貧賤良獨安但願桑麻長優游足
歲年

坐倦秋樹根攝衣步前丘橫河澹如練破月西南流獨持一尊
酒悠然發清謳俯仰無不足吾生焉所求

楊應登 字幼平臨江人

應登寬厚長者有德行言辭七試國子不第退就耕牧老于南塘孫雲

寄趙梅州

江城雁叫天如水寒色蒼蒼草木死哀孤未斷月東出有才無
命可流涕今我不樂思梅州帶潑衣百僚底天下規矩見卓絕
龍章麟角諸公子白頭時節得蠻府歸來開閉門呼不起

惆悵平生狗馬病風后力日牧長已矣為公問酒日日酤薰門
富貴憂患思始

水宿

水宿逢今雨春歸及故園聖朝臣已老往事客何言乞米分鄰
里看書到子孫蒼茫不可會一笑了清樽

楊 雲 字天章

迢迢空同山

迢迢空同山乃在西極顛玉泉蔭靈芝上有千歲仙安得凌風
翼相從白雲間神仙本冥漠天運仍推遷不如酌我酒或得成
自然田父要我語飲者亦非賢願君長獨醒加餐足高年

宋武帝廟

溪聲答松風巨石出老拳古樹不知名岌岌蛟龍纏夕陰互出

沒秋華帶芳鮮
蕙蕙帝王氣
基宇垂千年
虎賁秉霜戟
慘澹生雲煙
宮人翠龍駕
手持玉連蜷
昌明坐恍惚
精神雷在天
大呼司雍間
旬月無秦燕
昔為萬夫特
今受衆目憐
石馬亦埋沒
歲時草芊芊
小臣異代士
見之淚迸泉
齊人思爽鳩
蜀人哀杜鵑
江東舊正朔
禮奉敢不虔
但願君王心
不忘載荻船
下山又再拜
白日當空懸

宿峽山市

人煙正搖落
樓笛頗清圓
老樹依山驛
東風上峽船
江湖萬里外
燈火十年前
世路能令老
吾生且醉眠

早春

不知何處碧雲鄉
冉冉平生可斷腸
怪底乾坤惟理在
老來歲月更心長
城頭急鼓千家夢
江上殘梅一水香
自作醉侯開醉

國笑人奔走為誰狂

客

北客相催發
一日舉千帆
遙憐庾開府
歲晚望江南

番陽布衣

以下無名氏五人

有書中山驛云回首
萬里歲晚何言云云

番陽布衣題

回頭四十五年非
無賴秋光滿客衣
可惜吳中蓴菜好
陸機張翰不同歸

瀟湘漁父

崔瑒晚泊湘江
淡煙微月有客歌而過
之追問居與名置其釣竿長嘯而去

高枕形骸外
空江何限情
落葉不成調
半夜起秋聲

古碑文

揭大中云或漁于潭得片石字十數行率磨沒僅識得二
十八字意幽人憤士之作不合于時故沈之以俟知者
乾淳老人氣岳岳破冠穿履行帶索撐腸拄肚書萬卷臨風欲
言牙齒落

閩清野人

僧惠了行閩清谷中三日到一空舍稍憩有一人荷鋤來
便向熟睡僧既尋路還他日再往已焚其舍惟斫樹白而
云書

偶與雲水會不與雲水同雲散水流去杳然天地空

羅浮狂客

趙孟柔云柔錄事惠州聞羅浮道士言咸淳中客有戴烏
帽著靴往來山中見人輒大笑反走三年不言姓名他日
醉歸忽取煤書壁上
云云長揖渡海去

雲意不知滄海春光欲上翠微人間欲墮千劫猶探梅花未歸

右俱京末高人詩採清江杜本原編合為一卷

宋元詩會卷五十七

皖桐陳 焯默公輯選 後學程 任松皋參較

郭震

漁者

江柳弄風顰翠黛山花濕雨濕黼脂却收短櫂拈長笛一葉舸
中仰面吹

老兵

老來弓箭喜離身說著沙場更愴神任使將軍全得勝歸時不
盡去時人

雲

聚散虛空去復還野人閒處倚筇看不知身是無根物蔽月遮
星作萬端

江為

江行

越信隔年稀孤舟幾夢歸月寒花露重江晚水烟微岸直帆相望沙空鳥並飛何時洞庭上春雨滿蓑衣

魯文

大雪

方象曉一色皓然天地中楚山雲母障漢殿水精宮遠近梅花信高低柳絮風吟魂清不徹和月上晴空

錢昭度

野水

野水光如壁澄心不覺勞與天無表裏共月見分毫綠好磨長劍清宜汎小舸淡交今已矣惆悵越波濤

方中荀

虎邱

海湧起平田禪扉古木間出城先見塔入寺始登山堂靜參徒散巢喧乳鶴還祖龍求寶劍曾此鑿孱顏

楊修

三山亭

滿目江山異洛陽北人懷土淚千行不如亡國中書令歸老新亭是故鄉

蠶室

摘蠶抽絲女在机茅簷葦箔舊堂扉年年桑柘如雲綠翻織誰家錦地衣

齊雲觀

上界笙歌下界聞
縷金羅袖鬱金裙
倚欄紅粉如花面
不見巫山空暮雲

秦淮

一氣東南王斗牛
祖龍潛為子孫憂
金陵地脈何曾斷
不覺真人已姓劉

橫塘

早潮纔過晚潮來
一一軒窓照水開
鑑面無塵風不動
分明倒影見樓臺

青溪

傾城傾國兩妃嬪
此地聞名不見人
潛想舊時紅粉面
落花風裏步香塵

北渠

金殿分來玉砌流
黑龍湖撒鳳池頭
後庭花落恩波斷
翻與南唐作御溝

半陽湖

江南龍節水為鄉
水不純陰有半陽
一片湖光共深淺
兩般泉脈異溫良

長命洲

梁武慈悲不昂烹
蒙恩養亦虛名
狐狸口腹應潛飽
就死多予日放生

天闕山

牛頭天際碧凝嵐
王導無稽示妄談
若以遠山為上闕
長安應合指終南

白楊路

殘枝敗葉幾霑春莫問栽培迹已陳
細雨斜風恨無力蕭蕭滿路更愁人

洞元觀

葛玄功行滿三千白日驂鸞上碧天
留得舊時壇宇在後人方信有神仙

利登

雜興

我昔此園遊寒梅吐丹艷重來幾何間
叢青倏以遍誰云花與葉同樹不相見

青陽洞天呈主人曾少裕

兩崖蒼蒼峭天柱停策崖邊喚舟渡
青巾羽客打舟來驚起靈蛇絕溪去
千年神漿不自惜萬里晴天安得雨
但見飛泉落半

空空中此水來何處
出下猶涵太古泉
安知上不通銀浦
蒼藤半濕苔蘚昏
石罅無根迸孫樹
洞門一隙僅通人
可惜鑿空開空府
先生朝昏息丹崖
萬壑歸心心不語
瑤磬一聲天壁寒
白雲紫霧驚相顧

野農謠

去年陽春二月中守令出郊親勸農
紅雲一道擁歸騎村村鏤榜粘春風
行行蛇蚓字相續野農不識何由讀
唯聞今年秋粒顆民不收上堂對妻子
炊多糴少飢號啾下堂見官吏稅多輸
少喧征求呼官視田吏視釜官去掉頭
吏不顧內煎外迫兩無計更以飢軀受
笞箠古來邱壠幾多人此日殘生豈難
棄今年二月春重見勸農文我勤自鍾
情自釜何用官司勸我氓農亦不必勸
文亦不必述但願官民通有無莫令租
吏打門叫呼疾

或言州家一年三百六十日念及我農惟此日

江亭

江亭凭望久野色暝蒼蒼古木浮寒霧空山入夕陽水流前夜月風作早來霜却笑垂綸者因漁亦自忙

寶陀夙暮展遊不從心有作

寶陀十里路此日想同遊萬古不收雨四時長是秋樹寒烟半擁山濕霧還流我獨思歸苦無因到上頭

晚步

住在山塘深更深門前落葉與階平高人聽鶴來相過野老因推熟識名一水欲流山影去斷雲時傍燒痕生悠然獨步蓮峰夕十里松風秋月明

張弋

簡周宗聖

曠野有芳芷近江無早鶯春詩定多少旬日又清明樹暗憐楊柳花開認橘橙相尋每乖阻夢裏亦愁生

送宋謙父之清江因簡希亮

吟詩夕陽裏相送上蕭灘前路逢梅處同誰倚權看歲窮風力緊江濶雁聲寒持此呈蘇李人生識面難

懷章別紫芝

吟苦事俱廢拙深貧未除年來如旅雁秋至即移居古道行黃葉空囊貯素書一生江海恨惟子最知余

寄別顏伯奇

情深袂怕分豈不欲辭君轉柁方乘曉思山已隔雲菊當前路見雁在半江聞把盞秋終好遙憐白鷺羣

禪林寺

寺置蕭梁曾識少今朝
蘇磴始經過天低日落
江湖遠煙冷風清竹樹
多蟲引翠禽行壞屋馬
驚白犬吠縣蘿一僧九
十形容古岳下逢余忽
浩歌

俞汝尚

夏日閒居

無人到窮巷長日守閒
居宿火惟烘藥喜晴還
曬書鄰翁伴村酒稚子
課園蔬門外蒿萊地從
深不用鋤

裴說

寄邊衣

深閨乍冷開香篋玉筋
微微濕紅頰一陣霜風
殺柳條濃煙半夜成黃
葉重重白練明如雪獨
下閒階轉淒切祗知抱
杵搗秋砧不覺高樓已
無月時聞塞雁聲相喚
紗窓只有燈相伴幾展
齊紈又懶裁離腸恐逐
金刀斷細想儀形執牙
尺回刀剪破澄江色愁
捻金針信手縫惆悵無
人試寬窄時時舉手勻
殘淚紅箋漫有千行字
書中不盡心中事一半
殷勤託邊使

程子山

曜庵釣雪灘

待月凝雲館垂竿釣雪
灘虛窓堆冷翠傑閣聳
高寒籠養千齡鶴鑪燒
九轉丹不須論許事心
目自清閒

陳必復

客枕

客枕偏饒睡春歸尚用
綿屋深燈易暈漏短夢
難圓棲鳥驚涼夜鬧蛙
喧雨天一聲柔櫓過何
處上溪船

贈張駟駟自號牧隱

乍見語相和苦吟心更親老于琴得趣隱與牧為鄰一夜簷花
雨十年江樹春所交半湖海恨晚識斯人

沈說

溪樓

心遠俗塵隔樓高野性多稻花黃鴛雨山影白鷗波灘涉推船
上橋危挽客過日斜闌倚遍無句奈愁何

縉雲道中

去作京華客離家此月前問程恰中道數日近殘年山雨易成
雪村雲疑是煙僕行愁不進添乞酒漿錢

馮公嶺

曉上馮公嶺艱難見客情雨和殘葉落身逐亂雲行野店山腰
出秋泉石隙生若將世途此此路更為平

別墅

野舍清溪曲連茅接樹陰呼童隣錯應貫酒婦同斟落照收殘
雨寒烟出寸岑江湖成夢事投老屬山林

黃大受

晚步

扇小葛衣輕風清草路平水聲逢石怒煙素近山明喚犢牛回
顧驚人犬倒行耨夫方到屋月已屋頭生

朱繼芳

客路

閨閣空相憶那知客路艱背人前去鳥迎面遠來山夜泊孤燈
悄晨裝片月彎猿聲不知處杳杳白雲間

薛 嶠

天育道中

除將吟卷引琴與鶴相隨問寺路猶遠入山僧未知烏靈巢佛塔猿飲掛藤枝陵谷幾遷變道傍橫古碑

黃幼張

過臨平

孤踪逐浪萍幾度過臨平人語水相應帆移山倒行鷺飛秋嶼冷虹雨晚川明不是憑詩句丹青寫不成

陳 深

姑蕪臺晚眺分得高字

殘陽古城曲岌岌崇高臺不知何年創尚爾結構牢青山擁危楯白水環空濠美哉此山谿慘淡悲雄豪當代一戰霸意氣何矜驕蛾眉坐傾城忠魂隨怒潮空餘故宮院寒雀飛野蒿佳辰晤良友清眺舒煩勞夕風振叢薄鴻雁中天號永懷五湖客一舸凌雲濤浩歌滄浪詞願言從遊遨

李元應

折楊柳

東風來何時百花已飄零獨有堤上柳慘淡含春榮扁舟復何適延客江上亭願無青玉案何以送子行攀條欲相贈上有雙流鶯流鶯正求友奈此別離情

黃 簡

招荆江蕩子

衝風逐雲飛庭葉分墮槁蕩子久不歸佳人坐中老蕭蕭楚山晚湛湛江水流經從望夫石那得不回頭

黃文雷

晚立

獨遊得荒谿晚意與心會水聲遠終聞山色靜可對鳥語林塘
邊天吠籬落外柴門未須闕月在東風背

杜旃

綠珠行

蜀絲殷空金作谷珊瑚成林珠百斛彼姝千花萬花簇明月出
胎照波綠鏡中飛鸞掌中身夜月春風看不足悲歡倚伏儻禍
福西里憐顰東市戮願將舊意奉新人此別他生定難卜君因
妾死莫多怨妾死君前君眼見高樓直下如海深碧玉一碎沙
中沈平時感君愛妾貌今日令君知妾心

葉茵

漁家行

湖濱江澗疎疎村村漁家人子孫為魚不管風波惡出未天
明歸黃昏得來魚可數妻兒相對語甕頭有蒸熟鍋中無米煮
昔日魚多江湖寬今日江湖半屬官釣筒釣車漫百尺團圞空
多般蓋簑臘雪楊柳岸籠手西風蘆荻灘嗟嗟蚱蜢千百隻盡
向其中仰衣食幾謀脫籬江湖歸犁鉏似聞歲惡農家尤費力
促織

張翰

壁間吟不待秋時吟苦中宵動客悲勸汝不須催婦織家家五
月賣新絲
膾鱸元不動歸思拂袖西風已見幾江上如今來往客但言鱸
膾不言歸

去去

去去扁舟對晚暉晴和直欲減棉衣風來一陣蘆花過祇道春殘柳絮飛

汪莘

開禧元年十二月遷居柳溪上其夜大雪蓋宰來訪

茅屋凍將壓柴扉寒不開交朋幾竿竹兄弟數枝梅渡口月初出沙頭人正迴客居如自在歲事亦相催

徐作

開庵

藜苒空人室邱園隱者居一原青嶂合萬木綠陰疎手把歸田賦腰縣種樹書桑麻連畛秀網罟入溪漁何侮

贈王居士

多羨王居士心閒事事幽山從天未見江近枕邊流春園千葩秀霜林百果收更能窮物理濠上看魚遊地占松江勝為園不種瓜幽深清磬響高下石欄斜花密蜂隨蝶林深雀啁蛇勝如摩詰畫不是李鷹家

霜落川原淡風高木葉丹雲隨千頃白月墮一江寒禮佛因成塔焚香旋築壇竹聲過小院雜珮響珊珊

奇童二人

李獻可

吉水人年數歲孝宗召入宮中面試一詩立就帝嘉歎不已曰何不作我家兒

宮中午睡應制

御手指嬋娟青春白晝眠粉勻香汗濕鬢塵翠雲偏柳妬眉間

宋元言會 卷五十一
綠桃憎臉上鮮夢魂何處是應繞帝王邊

曾澈

問之江人眉目疎朗出語必援古今括蒼鮑輓遇諸江右驚問之乃逆旅主人子明年訪之死矣僅得遺詩一首于家

九齡行

我生九齡氣食牛暗鳴頓挫無匹傳白雲無根起天末一生萬事同悠悠低頭拱手事先覺談笑未了成怨讐一譽不足勝百毀言語起滅如浮漚聖賢可與知者道麟鳳豈在山中遊遽然夢覺大槐國江花昨夜生涼秋

陳焯有孫文鑑字鹿書幼稟奇慧生三歲能辨四聲七歲為詩多警句尤工制舉義出應小試輒冠儕偶鄉里呼以神童顧嗜學大勤每置食飲几案間當抽思正苦忘其寒溫適時進之失度愆和釀成痞疾竟以早夭有遺詩百首其兄弟錄為

小帙將授梓人偶讀曾童子九齡作追憶此孫有病魔篇亦十許歲時作悲咽酸辛情事何甚相類也嗚呼才人無命豈獨子安長吉留悵天壤哉附見于此用誌祝予之痛

病魔篇

有一病書生生長在桐邑自度非凡人無端被魔繫住世幾何年春秋纔過十太邱之耳孫行二又行一名字母勞問生死尚莫測旦暮長幽憂被魔勢方劇念我毀齒初就塾延師益父指為黃童祖目為李泌豈知命不猶耽思恒廢食踰時或加餐寒溫非所擇浸淫脾胃間久之成痞積驅痞亦何難只因魔作孽茲魔幻萬狀覩縷未易悉人生五臟全榮衛本堅實魔能抵其岷竭來據胃臆初發痛有期為期定酉戌厥後苦纏綿不分日與夕魔形大似拳魔氣通于膝髮鬚物作

聲衝喉半含咽行則聲呱呱坐則聲唧唧七筋握漸稀痛楚
 百端集家君覓良醫救療意惶迫但得魔驅除酬金誓弗惜
 醫聞接踵來指脾云痼疾攻補合兼施及時不可失就之詢
 醫方稜木並巴戟終餌遭魔怒奮起與藥敵涓滴強入喉觸
 忤致嘔噎魔似膠黏不受百草汁元精日消磨刀圭徒浪
 擲匍匐叩醫門醫言須改策藥貴力乃專復附效什伯但服
 更弗疑服久魔自戢咬咀動盈把烹煎各如式豈惟不中魔
 魔意翻自得液甘魔平分味厚魔竊吸金盡藥亦殫魔肥人
 愈瘡撐蒂骨稜稜無風寒慄慄復有後醫至相看勸弗急治
 此有秘傳庸師安得識岐黃八法鍼其經著甲乙任督與帶
 維隨症按腧穴投之得所宜癥瘕無不抉唯唯姑試之銀絲
 瑩如雪手擦入肌膚初無血痕跡漸刺痛莫勝鋒攢等蠶蠟

洞穴非不勝魔則已旁匿良久引鍼出衆患仍交作薰蒸雜
 艾納用助鍼芒直鍼灸既迭加魔損未毫末痛哭向魔陳君
 豈夙世業得非駘沈傳來宅我肝腸有罪應容湔有怨亦堪
 釋况係他生讐忍向童稚結願悉毀藥囊從君丐陰隲千百
 千百焚牲醴三日設束茅為君車裁筵為君檝求君暫捨予
 逍遙任所適貸以一息安冥報在萬劫灑血託青詞下書年
 月日

羽士二人

黃希旦

字姬仲邵武人生仁宗景祐二年幼穎拔能文章長而好
 道禮道士吳惟靖為師盡得其服氣還丹之訣外不立異
 好事者喜從之遊酣詠自得人皆莫知其
 所以異也熙寧十年脫去後有遇諸蜀者

和賈鴻舉移竹

琳房珠館何虛寂寶砌無塵苔蘚碧仙翁倚檻靜吟哦却憶箕
箒拂巖石勁節虚心守歲寒未嘗暫變風霜色移來迢遞不辭
勞深稜訝向瑤臺植漸承春意葉青青時惹天香烟幕幕月籠
翠影尚蕭疎露烟繁枝總滴瀝迎風閒夜擬龍吟結他年期
鳳食非才終約老烟霞此際謬當親採擇寄言紅紫莫相猜彼
此無情蒙化力逢時剪拂任他人沈去葛波都咫尺

性慵

性慵人事拙思向遠山居欲得事非少先宜來往疎善鄰惟水
竹良友祇琴書冷淡生涯外逍遙一室虛

春日書懷

二月又將半閒居興若何芳菲殊未賞泥濘阻相隔華切饒苔
蘚柴門長薜蘿韶顏須自惜隨分樂天和

采藥

采藥山中去扳躋不覺賒深源無俗迹滿地是靈芽巖迥陰留
雪澄溪淨見沙可憐名利客應笑此生涯

水心亭

為愛方池淨危亭此構新寒光搖玉鑑晴色戲魚鱗月上驪宮
蓮開水府春主人能息慮四座絕風塵

詠竹

生涯何所有滿砌植琳琅瘦影破秋月健梢橫曉霜且從喧鳥
雀終待集鸞皇吟遠都忘却誰知此興長

寄贈寶幢修山主

瑤幢真勝槩晦跡一禪翁語默呈心印縱橫振祖風晝閒人事
外夜靜月華中若問春來意松青百卉紅

竹洞

竹洞新開碧玉林徑幽疑入五華深夜篩明月一天靜晝擁青雲四座陰剪杖佇看雷雨化迎風時聽鳳皇吟烟霞不用重關閉塵俗誰能此訪尋

謝人惠星冠

學道多年尚屈蟠豈勝仙伯贈我冠曉簪乍覺星攢頂夜戴偏宜月滿壇對鑑寧煩朋友正避時羞為利名彈預思他日雲林下輕罩紗巾鶴髮寒

讀方干詩

數篇騷雅名雖遠三拜逢迎禮過差補得唇來身已老灌園何苦更咨嗟

葛長庚

字白叟福之閩清人七歲能詩賦背誦九經父亡母改適長庚遂從陳泥丸學道號海瓊子至雷州繼白氏又改姓白名玉蟾自受陳泥丸仙訣披髮狂偏走名山四方求詩文者戶屣常滿紹興壬午伏闕上書言天下事沮不得達因醉執隸京尹一宿乃釋是年十月至臨江軍飲慧月寺之江月亭忽躍身江流中諸從遊者急命舟援之長庚出水面搖手揮去而沒洪都之人皆謂已水解矣未幾見于融州又見于隴蜀云

厥初由闕閱吾志在林泉為不無地希顏儘有天魚蟲猶可

佛難大皆登仙願我非六六荷天良拳拳幼時氣宇壯長日文

彩鮮琴劍微暖席江潮動經年異乎三子撰契彼五家禪既已

出洙泗從而施倭佞肩依洪崖右道在靈運前所得既天秘與

交又國賢可圖大藥資以辦買山前東訪鼎湖浪西尋蒼梧烟

一寸百練剛半生雙行纏簪紳非吾欲魚鳥從所便逸興五湖

濶虛名四海傳飽餐青精飯細讀黃石編頃自七閩出放焉迷

市塵紅塵刺人眼名利交相煎富貴已嘗鼎雲霄當著鞭蹉跎

青春遲暮即華顛光景 倏忽物華隨變遷仰天時一笑顧
影長自憐紫府何冥邈青鸞何沈綿蓬萊雲渺渺小有月娟娟
策足青霞路收功黃芽鉛飄然復何往此去如蛻蟬

秋霄辭

仰觀銀河月千林散寒光佳人今何之遠在天一方秋聲酸我
鼻秋色斷我腸夜深倚西風清淚如雨霧世有千里馬可憐無
王良

孤月明秋空清影跨洞門彼美婵娟姿的是姮娥魂凄然到書
帙惘然入酒樽不歸廣寒家夜遊天子園無人知此懷驚烟籠
啼損

述古

帝子御飛龍鼎湖叫奚為玉京鬱崔嵬銀河汎渺瀰俯首視紅
塵萬蟻紛何知乘雲遊八極手翫珊瑚枝湯武事干戈此事矧
肯期但聞穆天子八駿會瑤池
河水一鏡清中有驪龍舞波心呈寶圖始末造化租燧人鑽炎
涼炎帝餌甘苦身披獠狨衣口服齧棘乳此時至尊者帝堦三
尺土羸政築阿房籤鏗纒偃樓

栖霞

冷煙纏山腰暗水冽石骨欲風松先鳴未雨苔已滑洞前多琪
花洞裏多紫霞高人得所栖日永蒸胡麻

樓前雨霽

飛廉驅鐵騎萬雨飛落地烟淡松自蒼風起竹似醉倚窻橫膝
琴政有作詩意白鳥飛忽來點破一山翠

戴月遊西林

悄然無人聲但有一杯月誰家鳴乳瓦萬籟靜不發蒼鬚指前路滿地鋪翠樾清露滴秋衾夜氣飛霰屑遙有無中烟渺天空潤劍光衝斗牛長嘯蒼崖裂步行二三里詩腸思酒渴冷雲曳山腰暗水洗石骨勒馬過斷橋枯木冷欲折枝頭驚鳥鵲根鳴蟋蟀試問夜如何孤猿啼不歇柴門自推敲殘燈更明滅

鶴林賞蓮

玉洞生翠霧瑶林映霏霞天飛明月英夜浴白蓮花碧水香已淨松聲吹露華衆仙鸞鶴散寂寂五雲家

步虛

清都五雲中天飛紫瓊上皆青琳府中有白玉京風露淒且冷葢宮雲冥冥玉童折珊瑚下弄銀河星

贈郭承務蘆鴈

畫士郭熙畫之冠郭熙去後名未斷其裔復有郭萬里胸中丹青飽無限為誰作此蘆鴈圖傑出南齊宇文煥烟水瀟瀟風捲蘆沙邊鴻鴈暮相呼瀟瀟洞庭此秋景世間此畫知有無幻出棲鴈三四隻八九葉蘆橫古磧欲宿未宿噉淚聲漁舟泊岸山烟黑秋風吹落梧葉黃過鴈往往歸衡陽橫空書字人不識飛過有影沈滄浪落霞浸水江村木數隻翱翔回古渡引領舉啄啄荷花飛越戍樓西畔去雲寒月淡西塞秋幾聲淒切惹人愁

胡東原香錦亭

東皇剖破勾芒腹錦心繡腸香馥郁絳都風雨傷愁春花魂無主自精神黃鸝初喚柳眼開海棠枝上春烟暖放出一點兩點紅墻頭紅腮微笑風東原去後花無主春工亦懶施機杼亭前忽遇詩酒仙花亦噴出香龍涎風催雨趨花不辨滿庭芬芳生

爛漫牡丹吐火花欲然日將錦繡鋪苔瓊詩狂夢與花神飲酒
醉不與神寢酒闌令我憶東原花木雖在人惻然此詩終不
為花作惆悵東原比丘壑而今賞花不見人但見蜂蝶飛閭亭

問月臺蘇竹莊同賦

千山萬山翠交鎖何處瑤臺天上墮臺前吟久忽登樓樓前開
窻天入座留天且莫放天歸問天明月來幾時青天推月上雲
表使我對月自問之試問月中王妃子人言羿妻無乃是夜夜
清風為作媒欲把冰姿嫁誰氏桂子婆婆今幾秋葉宮珠殿何
年修吳剛執斧胡不休玉兔銀蟾猶更留我聞明皇排空聽天
樂又聞李白騎鯨水中捉至今天上弄銀盤依舊萬里攢碧落
但見一輪月在天如何千江千月圓月還似水水似月千眼所
見皆同然今方得月為詩侶月亦有情但無語延月不久月竟

歸我欲乘風遊玉宇

行路難寄柴元

贈君以丹棘忘憂之草青棠合懽之花馬瑙遊仙之夢枕龍綜
辟寒之寶砂天河未翻月未落夜長如年引春酌古人安在宗
城郭今夕不飲何時樂

茶歌

柳眼偷看梅花飛百花頭上東風吹壑源春到不知時霹靂一
聲驚晚林枝頭未敢展鎗吐玉綴金牛獻奇雀舌含春不解
語只有曉霜晨烟知帶露和烟摘歸去莖束細搗幾千杵捏作
月團三百片火候調勻文與武碾邊飛絮捲玉塵磨下落珠散
金縷首山黃銅鑄小鐺活火新泉自烹煮蟹眼已沒魚眼浮颺
颺松聲送風雨定州紅玉琢花蕊瑞雪滿浮白浮綠雲入口

生香風滿口蘭芷香無窮兩腋颼颼毛竅通洗盡枯腸萬事空
君不見孟諫議送茶驚起盧仝睡又不見白居易餽茶喚醒禹
錫醉陸羽作茶經曹暉作茶銘文正范公對茶笑紗帽籠頭煎
石銚素虛見雨如丹砂點作滿盤菖蒲花東坡深得煎水酒
闌往往覓一呷趙州夢裏見南泉愛結焚香淪茗綠吾儕烹茶
有滋味華池神水先調試丹田一畝自栽培金翁姪女採歸來
天爐地鼎有時節煉作黃芽烹白雪味甘露勝醍醐服之頃
覺沈疴甦身輕便欲登天衢不知天上有茶無

聽趙高士彈琴

我尋屏跡到猿啼雲滿山前花滿溪高峰壁立七十二風生兩
腋天可梯煉師兩鬢東風黑紺天不流月光白簷芽咬雨昨已
晴松握長空夜瑟瑟與懷抱石玄以輕得意七絃橫玉繩膝頭
指美響玲玲燥然奪目三十星初如雨滴芭蕉夜久作梧桐猿
嘯罷宛然幽澗聽鳴泉偶雜修篁葛清夜先疑易水渡荆軻已
轉似勸無渡河美人金帳別項藉壯士鐵笛吹夢婆不然雙雉
兩南北或者婦牽蘇武服絃中何以湘妃怨指下為甚明妃哭
又非林下感蠨蛸更匪邊笳叫晚秋自然雁聲下遙塞忽覺蟬
噪過南樓君休彈終我畏聽滿懷今古興亡病蒼梧雲愁虞舜
遠鼎湖雲出軒轅冷一聲一聲復一聲不管世間銀髮生彈盡
天涯夕陽影又向山中彈月明胡長卿去已久韓飛瓊無此手
玉帝聞未曾人間空白首柳花霏霏滿江城城外海棠紅淚傾
恐君餘思更未已為我春晝鳴晴鶯

贈蓬壺丁仙人琴

瓠巴騎鯨上天去伯牙成連亦千古淺世斷無鍾子期絃中妙

意為誰舉春風春雨滿瀟湘人在蓬窓閒竹房竹裏鶻啼喉舌
 冷花間鶯宿夢魂香客中離沅下衡陽滿懷詩愁何處著請君
 拂去水晶塵淪茗一了撫然作道人問予若為情伊絃淒兮
 余聽一春十病九困酒三月都無二日晴俛首沈吟聲一曲吟
 徂一罷撚撥續初如雪泉嗽鳴玉已轉忽如雨菽菽于中亦有
 蟠蛸鳴倏忽變作冷猿聲始疑荆軻渡易水乃是湘妃夜涕零
 昔從撫斷南風了羨里幽人始能曉可嘆壇中苦杏花山高水
 寒即聲香道人此意非人問笑詠洞章鉞佩環能令舞鳳下丹
 漢雲裏大地垂頭看世間雞蟲互得失只好牧羊坐化石何為
 兒女謾呢呢候蟄時鳴徒戚戚輸君朝朝在翠微鶴已睡去人
 不知笑思古今一俯仰彈到千山月落時君知否梧桐枝上雙
 燕語盡將萬事等風絮琴中日月何條閒肯使事逐孤鴻度

有贈

我見千家鬧管絃金瓶玉水養春妍一朝花落空枝在爨下焦
 枯亦可憐曾聞李白之詩否以色事人幾長久斷盡殘英尚未
 衰月明人立黃昏柳

筆架山

吾是瑤臺翰墨仙操觚弄槩玉皇前翻雲為墨海為硯一片寒
 空如雪殘免毫象管用不得倒蘸崑崙醉鈎畫當年染罷八角
 芒金闕上章求放逸三峰坐斷江南天臨汝城頭蒼蒼然狀如
 筆架翠起伏與吾攔筆勦勦眠山靈驚呼猿鳥亂清魂復被風
 吹散起來叫問山前人幾度松枯白石爛

白雲庵

宿霧戀喬木落花粘瘦枝鳥聲人靜處山色雨來時霽月成相

約涼風解見知僧房安一枕海氣濯冰肌

順昌即事

筆下千機錦胸中一滴金乾坤春甕潤風月夜樓深世絕夫君
操人誰梁父吟只尋雲外路誰復聽寒砧

五更解醒梅竹之間徘徊體

宿鳥能傳語殘風且點心山情憐淡坐月色笑孤斟驚我梅花
睡聞他竹葉吟清歸無所得得句貴如金

博羅縣驛

虎嘯月生海猿啼風撼山夢回三鼓盡身自九天還雲氣浮窓
外泉聲入枕間問心宜富貴為復要清閒

景泰晚眺

海岸孤絕處晴沙露遠汀潮花人鬢白山色佛頭青夕照雌黃

筆秋烟水墨屏天空杉月冷鶴夢幾回醒

溫學士再訪山中

炎帝辭朱節清晨立素秋偕緋皆木葉脫白滿林邱流水高山
興疎風冷雨 詩人應自樂歌笑海東州

紅梅

人賦紅梅少余詩為補遺霞融姑射面酒洗壽陽肌太潔遭時
妬獨醒為衆疑漫隨春色媚自保歲寒姿

春日道中

洞口鳥呼鳥山頭花戴花風篁蒼韻玉烟樹晚籠紗懷白一樽
酒邀盧七椀茶春光索彈塵萬象曉排衙

梅窓

南窓屋數楹一點陽和生枝上雪粧瘦牆頭風 清霜天酒自

暖夜月夢難成何處人吹笛黃昏送幾聲

赤壁

不說山笑老權盡稱造化戲曹瞞飛鳥遶樹孤回首斷戟沈沙怒激湍豪傑已隨霜葉盡興亡儘付浪花翻畫堂莫唱坡仙賦戰鼓草中冷夜寒

泛舟黃橋歸廬山

清風為我送歸船數粒青松起薄烟帆影驚飛秋水鴈櫓聲攪斷夕陽蟬几人家在溪頭岸一片雲生水底天滿眼良朋無好酒此心已掛九江邊

留別錢柱宮葉法師

不嫌來往日詩筒春興無窮我欲東一雨放行三尺水萬松回納半帆風且將南浦難題景寄在西山絕頂峰柳處酒家花處

寺併留他日款遊從

悠然堂

一池寒碧浸紅鱗芍藥方開春後春烟閣曉隨天幕靜風簾下上月釣新聞雲流水無窮意絳闕清都被謫身不向悠然堂上飲詩篇斗酒付何人

題甕齋

萬軸牙籤聚碧雲數間茅屋鎖閒雲鶯吟芍藥一歌女蟻繞菖蒲萬水軍香穗橫窻盤瘦影茗花浮枕鬪清琴心三疊晝眠覺熟讀數篇韓柳文

題平江府靈巖寺

萬松挾嶺壯招提上有琴臺與墨池佛殿尚存今智積娃宮曾館古西施太湖遠水如奩鏡水瀆平田似局棋策杖訪回無際

塔日晡聊看草書碑

次韻東坡蒲澗寺

滿山紅白福桑花蒲澗深中儘可家景泰得泉從卓錫安期種
惠說成瓜豈無仙花羊如石尚有書踪筆似鷗一飯招提共僧
語法華經裏問牛車

秋日有懷

一點秋光寄畫圖秋來吟鬢似楓疎晴烟染樹看何足缺月梳
雲壯不如暑退涼生蟬有語水長天遠鴈無書此心直欲鵬南
舉不學蜘蛛結網居

柳塘送春

急雨將雷過柳塘春因底事亦歸忙經時不放荷花葉昨夜盡
收梔子香判斷千林成夢去安排一夏納風涼開眉無覓愁來

處數筆晴雲盡水鄉

寄桂隱

指點篇書說向誰武侯之後獨公奇許瓢却大堯天小嚴瀨應
高漢座卑夙世已酬霖雨債我身今結水雲知何人桂樹中間
隱莫作南陽一睡驪

草亭偶書

賦罷清都白玉樓不知何事復闔浮琴彈十二欄杆月酒洗三
千世界秋絳闕瑤臺知有路空青水碧若為求紫皇早晚憐孤
憤背土凌雲上去休

夢中作

醉醒曳杖松關正在黃昏掩靄間既去復來春後暑似無還
有雨中山澗邊幾葉晚花落天際一鈎明月彎自覺餘烟埋屐

齒行行印破蘚苔斑

呈沈同知

三面俱江一面湖古今畫作水晶圖
門臨車馬紅塵路身在水
霜碧玉壺何道兩山俱翠紫
雲蒼二水合清污岸頭笑與黃冠
語為問東林沈在無

乞紙寄諸葛桂隱

翰墨膏肓二十年纔親筆硯便垂涎
東陽魚卵寒霜幅嵎縣溪
藤妙雪牋一日禿除千兔穎
霎時磨盡萬松烟洛陽市上今無
價直欲昂頭寫碧天

燕巖遊罷與巖主話別

西風吹作此巖遊滿目松筠翠欲流
玉燕不飛明月夜石鐘一
振曉霜秋惜乎分水便南北忽爾回頭欲去留
且向人間辨丹
料却來山頂結茆休

題上清法堂壁

秋雨縣天風作寒冷烟鎖住屋頭
山半巖飛鳥一聲過峭壁斷
雲千古閒世俗不知幽靜處
神仙隱在有無間夜來小艇篙脫
手醉把霜筇入翠灣

宋元詩會卷五十八

皖桐陳焯默公輯選

後學程仕松皋參較

衲子四人

惠崇

宋初人工繪事宋子京有過其舊居追悼之作蘇黃集內題詠屢見而詩畫中則云崇于詩句慣襲唐人如河分岡勢春入燒痕之類是其佳處自不可掩也

池上鷺用明字

雨歇方塘溢遲回不復驚曝翎沙日煖引步島風清照水千尋
迥棲烟一點明主人池上鳳見爾憶蓬瀛

贈文兆

偶依京寺住誰復得相尋獨鶴窺朝講鄰僧聽夜琴注瓶沙井
遠鳴磬雪房深久與松羅別空懸玉屋心

訪揚雲卿淮上別墅

地近得頻到相携向野亭
河分江勢斷春入燒痕青
望久人收釣吟餘鶴振翎
不隨歸路晚月明上前汀

宇昭

與魏仲先同時其詩澹雅
清醇亦頗得魏之風致

曉發山居

蓐食小人家寒燈碎落花
鷄鳴窓半曉路暗月西斜
世故欺懷抱風霜老歲華
劇詩思苦悽惻向長沙

贈魏野

別業惟栽竹多閒亦好奇
試泉尋寺遠買鶴到家遲
藥就全貽母詩高祇教兒
未能終住此共有海山期

塞上贈王太尉

飛將是嫖姚行營已近遼
河水堅度馬塞雪密藏鵬
敗冠殘旗在全軍列帳遙
傳呼更號令今夜取驕

寄題武當郡守吏隱亭

郡亭傳吏隱閒自使君心
卷幕知來客縣燈見宿禽
茶烟逢石斷棋響入花聲
會逐南帆便乘秋寄此吟

留題承旨宋侍郎林亭

翰苑營嘉致到來山意深
會茶多野客啼竹半沙禽
雪溜縣危石風燈射遠林
言詩素非苦難答侍臣心

寄保暹師

吟會失秋期荒山寄病時
客髭生白早叢木落青遲
渴飲窺沙井陰虫占菊籬
歸心何以見霜月下天涯

幽居即事

掃苔人跡外漸老喜深藏路僻閒行遠春晴晝睡長餘花留暮
蝶幽草戀殘陽盡日空林下孤禪念石霜

道潛

道號參寥於潛人哲宗賜名妙總大師蘓軾守杭日卜智
果道院居之又為作參寥泉銘嘗稱其詩無一點蔬笋氣
體製類備
光義云

廬山雜興六首

古帝論匡山南國之德鎮爾來得躋攀此語始無信雄雄壓九
江轟轟排萬刃青天落飛瀑白日雷霆震石鏡忽開孤光舞
而運異花無冬春瑤草亦芳潤遠公初渡江道譽藹東晉劉雷
贊高風邈世各無悶陳迹虎溪頭子今誰與訊
衆峰勢連環萬疊不可窮香爐獨秀拔佳氣常葱葱長風卷遊
霧曉壁開瞳矐招提出其下樓觀排紅回眸盼五老刻削金

芙蓉宜哉請仙子愛此巢雲松

南山信美矣山北尤增奇春風錦繡谷紅素自相依梯空上絕
巘雲日驚倒窺崖壁暈祥光五色成玻璃旁通大林寺松竹短
且敬樂天當日遊四月桃始披餘齡願寄此永與世人違

龍湫亘三峽草木皆森奇禪餘得支徑別塢行逶迤上人吳門
秀邈有方外姿芒屨襯兩足策策欣相追秋田罷刈獲雲木明
空陂雙雙林中禽文彩光陸離雍容事飯啄相顧忘驚飛鮮颺
忽騰馥岳桂飄歲蕤峰端卧落日春此忘還期

霜清玉繩曉澗谷風未號澄潭不可極俛盼驚毛豈不有神

物于茲能遁逃海日射兩崖餘輝何昭昭遊麟出岸穴翻覆如
銀刀偶來殊不惡勝事俄所遭聊為五字詠遠愧謝與

高巖吐奇雲倏忽千萬丈援毫欲名貌卷縮非一狀飛仙或逮

遊隱隱出其上驚飈忽吹滅轉眄惟清嶂山中勝事多彼俗誰能亮

秋日西園

秋山夜來雨雲氣朝尚昏禪庭無來轍但見落葉繁石室暗燈火天容開霽痕耳目思遠適曠然啓層軒長謠緩輕策去去窮深源方塘灑清流鳧鴈靜不諠時適羲皇翁容與偕笑言邈然採其賞歲宴誰與論

子瞻赴守湖州

山烟美滅沒山木含蔥蒼刺舟傍遙岸理策升虛堂周遭屬曾噓矯矯如翱翔下瞰平田流淡然浮日光青篔簹解初籜洗雨聞清香雖云迫前途真賞豈易忘

松門暗朝雨寂歷無行人隆曦忽漏卉木蔚以新階前瀨石

齒照眼光磷磷使君美無度卓犖遺囂塵風標傲竹柏談笑凌穹昊何愧沈冥子卧霞石結璘

揚帆渡江來洗眼驚翠樾雲姿既容裔鳥哢更清絕凌梯訪前蹤琬琰亦未滅嗟我魚目光疇能綴明月狂墨掃琅玕風烟坐中發殊勝區中人茫茫走飛轍

和龍直夫必校細雨

細雨連阡陌輕雲濕不飛池寒鷗自卧巢冷燕催歸恹淡疑沈樹飄蕭忽近幃簷花霑已久稍欲墮人衣

傍砌飄纔斷從風強更來斑斑泣珠網浥浥汗江梅薄日光時漏層陰意未開少陵心易感詩句寫清哀

次韻秦太虛夜坐

古寺冬蕭瑟天寒色更冥捲幃延素月轉眄失流星爐底眠枯

耕窻根立凍瓶談餘焚柏子一燧小烟清

廣陵城外野步呈莘老

林梢聒聒鳥聲繁積雪初消澗水渾老樹卧波寒影動野烟浮
草夕陽昏風回笛響山前路犬吠人行竹外村杖屨不知幽興
遠歸來新月在柴門

次韻朱伯收主簿觀雪

朝來密雪蔽天涯坐目邱園發素華初著敗梧驚擁腫久霑庭
竹見敬斜水晶不動垂千筍雲母無聲落萬家安得曾穹返收
拾莫教狼藉渾泥沙

次韻姜伯輝朝奉宿九曲池

當時樓閣已桑麻陳跡何須置齒牙宛轉頽城圍綠野嵌奎孤
塔背明霞山雲度晚飛瓊葉海月生秋墮桂花圓嶠方壺同笑

語終宵疑在水仙家

次韻子瞻飯別

鈴閣追隨半月強葵心菊腦厭甘涼身行異土老多病路憶故
山秋易荒西去想難陪蜀芋南來應得共吳薑白雲出處元無
定只恐從風入帝鄉

夜泊淮上復寄逢原

黃沙白草滿淮垠逆旅蕭條思不禁風約亂雲歸隴首角催明
月出波心槎頭湧出潮初上斗柄移時夢未成遙想故人投宿
地畫船應在碧榆林

夏日龍井

二首呈辨才法師兼寄吳興蘇太守并秦少游時游時在越

翠樞高蘿結晝陰驕陽無地迫吾身石厓細聽紅泉落林果出
嘗碧奈新揮塵已欣從惠遠談經終恨少遺民何時暫著東山

屐來岸鳥紗漉酒中

自憐多病畏炎曦長夏投蹤此最宜青石白沙含淺瀨碧梧蒼竹聒涼颼雲中鷄犬聽難辨谷口漁樵問知斑杖芒屨隨步遠歸來幽火認茅茨

游徑山懷司馬才仲

柔桑蔽野麥初齊布穀催耕雨一犁略時橫溪上下薔薇間發水東西重尋勝處追前賞無復斯人共手携回首春風增感慨綿蠻黃鳥更悲啼

照閣奉陪辨才老師夜坐懷少游學士

猿鳥投林已寂然芭蕉過雨小樓前雲依絕壁中間破月自遙峰缺處圓照坐不須紅蠟炬可人惟有蕙爐烟枝酬御府圖書客疇昔還同此夜禪

次韻東坡居士過嶺

一時遷客盡難堪二老高懷默自甘造物定知還嶺北暮年寧許滯天南安排拄杖尋廬阜斗擲征衣洗瘴嵐他日相逢長夜語殘燈飛燼落毳毼

寄王晉卿都尉

主第耽耽冠北城位居侯伯固尊榮肯將踏月趨朝脚來伴穿雲渡水行池上紅葉應漸老山中紫筍尚抽萌崧陽迤邐遷川原勝聞說宅時卜釣耕

同韓子蒼遊黃山觀約高壽朋張公碩不至

駝裘躍馬去翩翩一舍巡巡箭脫絃仙事未須窮傳記勝遊聊為好山川穿林絡石驚寒溜繚白縈青對篆烟惆悵能文二三子操觚安得共周旋

次韻才仲山行

幕府文書一掃空何妨行樂醉春風想聞笑語千山外正在烟
雲萬疊中呀日鳥聲喧細碎照溪花影盡玲瓏苦吟只恐凋肝
腎夫子還宜少黠聰

絕句

高巖有鳥不知名款語春風入戶庭百舌黃鸝方用事汝音雖
好復誰聽

秋江

赤葉楓林落酒旗白沙洲渚夕陽微數聲柔櫓蒼芒外何處江
村人夜歸

江上秋夜

雨暗蒼江晚未晴井梧翻葉動秋聲樓頭夜半風吹斷月在浮
雲淺處明

春晚

曉風池沼水瀾翻春盡淮南麥秀寒院落無人日亭午柳花如
雪滿闌干

次韻少遊學士送龔深之往金陵

虎踞龍盤亦漫雄城荒狐兔往來通可人惟有秦淮月出沒涓
涓波浪中

子瞻席上令歌舞者求詩戲以此贈

多謝東山窈窕娘不將幽夢惱襄王禪心已作沾泥絮肯逐春
風上下狂

與元規話別

湖水蒼茫四接天短篷孤榜自回旋想君東海東頭夢猶在汀

洲白鳥邊

惠洪

字覺範江西新昌俞氏子又曰姓彭氏難染之後以請賜
牒責令還俗用張商英奏仍得為僧又以郭天信之請賜
號實覺圓明禪師及張郭得罪惠洪亦坐交結竄崖州未
幾赦還建炎初示寂按宋史郭天信傳中稱僧德洪真
與惠字畫相近其誤宜也

雪霽謁景醇時方築堤捍水修湖山堂和韻

築堤蓋南堂雪霽響新瓦我踏雪泥至自携雙不借愛公有俊
氣句法洗凡馬清婉彭澤寒陋笑東野願為西崦鄰投名入
詩社餘年五事濟過從有公者何時聞折竹燈火共清夜

陪張廓然教授遊山分題得山字

先生如梁鴻得耀亦愛山相西十日留笑語烟雲間弄泉石梅
塢喚丹青蘋灣藉草飲松下松風當吹彈二妙生清妍山花挿

雲鬟粲然起為壽舞袖相翩翩先生墮幘醉頗覺天地寬醉語
忽成詩為題蒼壁顏城郭遙相望但見千峰寒

送彦周

彦周美少年風味映前古今人每見之不敢發鄙語推墜吾法
中偃蹇揖佛祖死生人所怖玩之于掌股此生幾離別此別覺
酸楚夜寒衆峰高獨着霜月吐

謁狄梁公廟

九江浪粘天氣勢必東下萬山勒回之到此竟傾瀉如公廷諍
時一快耶願藉君着洗日光正甚閒暇使唐不敢周誰復如
公者古祠蒼烟根碧草上屋瓦我來春雨餘瞻嘆香火罷一讀
范公碑煩塵看犇馬斯文如貫珠字字光照夜整帆更遲留風
正不忍挂

同彭淵才謁陶淵明祠讀崔鑿碑

晉室東渡後主弱祇如寄桓温弄兵權劉裕竊神器先生于此
時潔身良有以袖手歸去來詩眼飽山翠追還聖之清太虛絕
塵滓長恨千載心斷絃掩流水

懷慧廓然

蕭蕭暑雨過空山成夜晴月出東南峰娟娟風露清飛螢自開
合寒蟬亦悲鳴興來忽獨往聽此落澗聲永懷西湖上絕景玉
壺明松際條然姿振策自經行即欲呼就語忽隔千里程何時
徑尋子夜航過臨平

同超然無塵飯柏林寺分題得柏字

沙村宿雨餘炊烟淡寒色山墟蚕市休野飯漁舟隔忽逢柳際
門知有道人宅叩扉山答影童子出迎客空庭竟何有凍死千
歲栢鐘鳴食時至老僧揖就席香秬定宿春露葵應曉摘羞飢
一飯美何啻萬錢直風軒納山翠引手捫石壁愛此玉崔嵬歲
久自崩圯下有洄渦泉甘凉水齒頰勿輕一脈微去漲萬頃澤
吾行無疾徐住住去亦得欲收有聲畫絕景為摹刻興來弗傷
緩轉顧成陳迹

仁老以墨梅遠景見寄作此謝之

荒寒掃橫斜稀疎開未徧烟昏雨毛空標格終未見吳姬風鬢
亂睡色餘妒面誰令種惟香風味極不淺道人三昧力幻見隨
意現塞管玉織寒無勞寫哀怨

居上人自雲居來訪明日告歸作此送之

浮雲山盡際花木迎春暉佳人殊方來見之消渴飢藉草坐松
影粉香時落衣氣貌秀可掬出語超幽微巖壁鐘聲寂山陰花

發稀去袂挽莫留又作甌峰歸

送通上人遊廬山

少年四方志一餘巖中朝來過微雨扁舟買南津廬山冠天下况復當青春泊星渚雲開蒼翠新相看發一笑瀑布垂天紳虛漢清月上山空無四鄰應懷千載姿坐榻空埋塵興來得好句錄寄北山人

奉陪王少監朝請遊南澗宿山寺步月

單衣喜和風詩眼愛空翠野庭亦脩然散坐聊倦倚坐久忽聞樵相視一笑喜那知深林外曲折見流水幽光弄紺碧春色潑秀氣去為千頃澤隄柳相嫵媚月光方下澈浮空見鬪尾投磔戲驚之撲撫沙禽起歸途望林壑烟靄隔山寺便如斜川遊歲月亦相似

觀山茶過回龍寺示邦基

北窓賞新晴睡美正清熟竹鷄斷幽夢朦朧不能續卧聞故人家山茶已出屋欣然一命駕妍煖快童僕千朶鶴頂紅染比叢間緣坐客例能詩秀句抵金玉携過回龍寺掃壁為君錄逸筆作波險歌斜不可讀坐驚殷床鐘暮色眩雙目

同敦素沈宗師登鐘山酌一人泉

鐘山對吾戶春曉開烟鬟白雲峰頂泉紺碧生微瀾經年未一酌對客愧在顏兩翁亦起放瘦策容躋攀大千寄一瞬境靜情亦閒是時天慘慘佳處多遺刪立談共嘲謔豪氣破天慳臨川冰玉清風流寄東山孤坐嶢絕處掉頭不肯還天風吹笑語響落千巖間歸來數清境但覺毛骨寒

宿宣妙寺

衝虎困頓歸投枕眠爛熯夜晴霜月苦睡美不知旦日高披曉
綠萬事付衰懶百年炊黍久強半得憂患起臨清淺流白髮不
可揀此生終一壑形勝已入眼明年定來歸茅屋並崖瞰掩門
無營為一味工寢飯

次韻道林會規方外

湘山半夜雨斷我西湖夢卧看讀書燈花作扶頭重曉寤晴潑
眼倒挂聞么鳳起尋殿寒梅小立幽香噴柳絲不勝縮筭庭春
脈動春色已如許樂事非一種平生所懷人忽此笑語共雲軒
為誰停危坐山衲擁眼高空叢林志大骨森聳開懷見赤心疊
疊飽談誦坐客鶴腦側我亦快心孔袖中出新詩筆力發毫縱
風日麗醇醲黃泥初揭甕舌根有滄海潮辯自掀湧何當橫枯
藤齧鏃追兩本吾宗欲顛覆支者例闌茸君能為我起逸足王

良控我詩如石田疏理終無用朝來強鉏豎秃筆時呵凍摩挲
銅鏐腹博君一笑捧

贈蔡儒效

我家與君鄰屋居君昔未生先長我君髮齊眉我捩角竹居讀
書供日課君誦盤庚如注瓶我讀孝經如轉磨長老竒君王佐
才試目顛顛觀長大十三環坐同賦詩出語已能驚怯懦風雷
繞紙成千篇棄遺不惜如涕唾神思義表文 明清絕如珠肯
受浣江左相傳紙價增東坡一讀無復和懷高識遠不可屈功
成回首破甌墮家貧口衆難自安出圖斗粟充飢餓俄聞筆陣
掃萬人上國英雄膽先破殿前作賦聲摩空盛名四海爭先播
華琚如蔥馬如龍九衢突若流星過我經憂患早衰微生怕虛
名招實禍方衣童首住江村飽飯愛尋閒處卧睡餘信手摸書

看會意起來行復坐林泉成趣亦題詩年來藁帙成 塚仙郎
開卷面發光誇我雄詞驚李賀相期他日同此游先買鄰庵山
數朶青松白石聞此言共作廬山二十箇

汪履道家觀所蓄烟雨蘆雁圖

西湖漠漠生烟雨浦浦圓沙鳧雁聚今日高堂素壁開忽見西
湖最西浦翩翩兩雁方欲下數隻飄然掠波去獨餘一隻方穩
眠有夢不成亦驚顧蕭梢碧蘆秋葉赤青沙白石紛無數我本
江湖不繫舟爾輩况亦江湖侶令人便欲尋魯郎呼船深入龍
山塢

李德修以烏蘭河石見示賦此還之

予友李德修少豪逸有美才工文章一時輩流推之聲
譽著場屋紹聖初選于廣文至禮部好惡不合有司棄

去遊邊往來蘭會甚久晚屏跡田園然視其氣貌精特
功名一念未置也政和七年上元前四日過予袖中出
美石一掬大小二十八枚有青紅碧綠色細視之有旋
螺文如人指紋以予曰吾嘗與諸將至古烏蘭大河
河中有舟鄰夏國此石得于大河洲中其為我賦之予
為大笑曰君同時輩流皆踐清華為顯仕躍馬食肉久
矣獨從予山中食脫粟玩朽石不亦大迂濶哉然德脩
頗非予言為作詩以還其石

烏蘭洲塞夏國口大河天來箭激溜排空但聞地喘吼勢撞石
壁欲穿透石堅捍之不肯受擲雷濺雪喧夜晝千年石骨亦不
朽碎為青紅雜怪醜疆場久空爛甲冑舉觴天子千萬壽李侯
橫槊千騎後望雲賦詩劍礙肘徐射河流馬俯巖下馬得之等

瓊玖萬里歸來亦何有出以示我為拊手笑君兒嬉忘白首李
侯氣如春在柳大河西國置懷袖君徒自珍世不售敲門那能
易升斗功名偶然夢豈久道人乃爾自薄厚此石笑汝汝漸否

南昌重會汪彥章

彥章退然才中人訕訶唾笑皆奇偉看君落筆扶風雷煥然行
文風行水坐令前輩作九原子固精神老坡氣儒生寒酸不上
眼此郎要是天下士嗟予生計等飛鳥翩翩吳頭復楚尾去年
興發看京華笑傲清狂人背指君坐折簡坐致我迎門歡笑自
契履舊聞牛鳴馬不仰女逐臭夫邨有理今年黃花南浦岸忽
然見君失聲喜僧房借榻營夜語燈火照人如夢寐懷中卿相
且袖手翰墨風流聊戲耳行看上書苦塊中凜凜范公只君是
福巖寺夢訪廓然於龍山路中見之

山高夜氣催煩暑竹風為作南風雨夢隨柔櫓到西興艤舟步
入龍山塢蕭蕭松下逢睿郎問信遠來亦良苦覺來但記談笑
歡不省歡時竟何語看篝燈一點明嶺海茫茫隔吳楚安得
却如清夢中杖履追隨長爾汝

魯直弟穉川作屋峰頂名雲巢

只今海上青石牛曾卧天子黃金屋下看朱紫如堵牆上前諸
公遭抵觸眼高四海鏡面空濤山歸來巾一幅慚愧君家小馮
君自是河東真鸞鷲文章五色體自然秋水精神出口眉目人
間不是但聞名水非醴泉石非玉江南一峰獨高寒時時笑語
雲間宿弟兄出處相高故作雲巢對山谷

題李愬畫像

淮陰北面師廣武其氣便可吞項羽君得李祐不肯誅已知無

宋言會
卷五十一
濟在掌股羊公得化行悍夫卧鼓不戰良驕吳公方沈鷲諸將
底早笑元濟無頭顱雪中行師等兒戲夜取蔡州藏袖裏遠人
信宿猶未知大類西平擊朱泚

神駒行

沙丘牝黃馬已俗俗馬千年不能嗣忽生此馬世上行神駿直
是沙丘子紫駭爭光夾鏡眸轉顧略前批竹耳雪蹄卓立尾蕭
稍天骨權竒生已似緣絲絡頭沫流背繡帕搭鞍初結尾決驟
意態欲騰驤奔逸長鳴抹千里

贈許邦基

邦基今年方十九美如濯濯春月柳龍章鳳姿絕世無金馬玉
堂如故有酒闌愛捉玉麈尾玉色正同批誥手高燒銀燭照新
妝看君落筆龍蛇走欲驅清景入秀句萬象奔趨不敢後人疑

錦繡腸肺腸不然筆端應有口謫仙風流今復見况亦髣髴外
塵垢但恐功名纏縛人未放青山挂窓牖

謝安道花壇

三月江南春不淺謝家池上開花苑層壇迸破碧琉璃嫩蘂簇
成紅變婉一枝兩枝和霧白素娥月下逢姑射十朶五朶照水
紅仙姝並立瑤東人生遇景須行樂莫使餘香散簾幕白雲
難迓鬢上斑金尊且對花前酌時人莫以花為浼大都自是人
情改若使人情長似花相看顏色年年在

夏日西園

晚庭一霎過暑雨高林相應山蟬鳴南窓夢斷意索寞牀頭書
卷空縱橫蔬畦日涉已成趣起來扶杖園中行葵莫豆莢小堪
摘矮榆高柳陰初成野禽啄果時落地池塘蓋水新荷平歸來

西屋斜陽在原舍尚聞春籟聲

自豫章至南山月下望匡廬

扁舟秋晚離南浦片席搖風望星渚揚瀾大浪晴泊天南山窈
窕開蓮宇倒檣散策一登臨便擬掩開深處住吾生飽食隨東
南去亦無求住無取江南得意且題詩從遊况復皆真侶青燈
灼灼夜窓深對窓卧聽風甌語隔岸廬山金碧開月明尚記曾
遊處

贈玉敷素蕙簡正平

空山無人舟壑移坐看香燒行篆畦兄弟華軒肯過我墮甌噉
帚生光輝著屐登山亦不惡携被假宿良幽期燈前綠髮映玉
頰風流未數崔宗之夜談詞辨出神駿絕塵亦免真推奇我欲
置君師河朔軍前千騎紅妝隨橫槩吟詩慷慨玉帶錦袍英特
姿又欲置君玉堂卧霧窓悲儿春晝遲醉中草制驟風雨諸公
堵立相嗟咨微吟擁鼻笑不語恐未免爾無多辭為君張燈掃
東壁他日重來讀此詩

浙竹

龍孫初長浙江曲疎影蕭蕭濯寒玉平生知愛足風流只有山
陰王子猷而今流落蒼崖頂暗喚年光鄉路永冰敲雪壓未應
衰鸞鳳不棲空故枝堅幹猶嘆製長笛最合宮商勝金石為君
吹動鏡湖秋驚起雙龍翼小舟

郭祐之太尉試新龍團索詩

政和官焙雨前貢蒼壁密雲盤小鳳京華誰致建溪春睿思分
賜君恩重綠楊院落春晝永碧砌飛花深一寸門下賓朋還畢
集碾聲驚破南窓夢高情愛客手自試春霧脚縈雪花湧我有

宋元詩會 卷五十八
僧中富貴緣此會風流真法供

山寺早秋

千本蒼山俱合抱夕陰相映寒蟬噪殘僧獨歸清入畫秋色滿
庭濃可掃霜中初啟月未生但覺篝燈一點明階除環珮走流
水樓閣誦經童子聲

讀瑜珈論

此生已無累一席可窮年細嚼寶公飯飽參彌勒禪懶修精進
定愛作吉祥眠夜久山空寂 聞繞砌泉

夜坐分題得廊字

一雨餞殘暑瘴疴蘓簟涼卧聞山果落起覺斛蘭香幌內水螢
入階除露葉光知誰愛清境步履響修廊

早行

失枕驚先起人家半夢中聞鷄鳴早晏占斗辨東西響濕知行
露衣單怯曉風秋陽弄光影忽吐半林紅

湘陰馬上和季長見寄小春

風埃九十里霧雨濕駝裘雁過回詩眼江寒聚晚愁魂清方怯
雪句冷更含秋殘岸連孤嶼依稀似橘州

湘上閑居

夜清暑雨過四壁草虫鳴一枕幽人夢半窓閒月明推頰弘法
志老大住山情忽憶陳尊宿編蒲度此身

西齋晝卧

餘生已無累古寺寄閒房睡足無來客窓空又夕陽叢蕉高出
屋病葉忽飄廊起探風簷立飛蚊避晚涼

秋夕示超然

夜色已可掬林光翻欲流一鈞窺隙月葉葉攪眠秋清境抹歸
夢殘缸替客愁搜詩時畫度忽覺此生浮

次韻真覺大師瑞香花

殘色映華堂清寒薰夜香應持燕尾剪破此麝皮囊有恨成生
睡無人見喜妝故山烟雨裏寂寞為誰芳

清明前一日聞杜宇示道道芬

籬外花如海閒軒小寢驚最先聞杜宇更覺近清明雲愁知為
雨風和拗得晴阿芬甘劣我笑裏恰詩成

送僧歸故廬

投名身入社卧病偶思歸渡澗脫芒履扶藤下翠微寒松猶帶
雨瘦骨不勝衣若見空鑽紙當施百丈机

重會雲叟禪師

氣味似前輩見之長眼明閒須研法味老不減詩情草聖因蛇
鬪禪枝解虎爭一堂聊寄傲疎快餞餘生

次韻衡山道中

嶽色墮馬首嵐光忽滿襟眼寒知意適句苦覺愁侵沃野獻新
祿殘晴釀晚陰天涯驚去雁料理欲歸心

題夢清軒

小軒人不到修竹過墻生眼倦經長掩身閒夢亦清微風吹篆
縷活火潑茶鐺遙想佳眠夕蕭蕭雨葉聲

燈花偶書

岑寂一閒僧春霄清興增竹窻催夢雨蘭室對禪燈世事如虛
幻人情剪愛憎短長都分定不恨百無能

宋元詩會卷五十九
 龍鄉戒曉月空斜喚起清圓響
 終車燒筍餉田村窈窕拾薪煮
 繭語諠譁美欣崖密膏新果香
 識山磬稱意花歸去路迷光已
 夕浸門春水一池蛙
 送瑩上人遊衡嶽
 紫蓋峰頭樓閣生朱靈洞口水
 雲晴盤空路作驚蛇去落日人
 如凍蟻行重郭老師今健否
 藏年珍木但聞名定應自掃巖
 邊石時發披雲嘯月聲
 訪友人
 後學程仕松皋參較

宋元詩會卷五十九

晚桐陳焯默公輯選

惠洪

資國寺春晚

龍鄉戒曉月空斜喚起清圓響
 終車燒筍餉田村窈窕拾薪煮
 繭語諠譁美欣崖密膏新果香
 識山磬稱意花歸去路迷光已
 夕浸門春水一池蛙

送瑩上人遊衡嶽

紫蓋峰頭樓閣生朱靈洞口水
 雲晴盤空路作驚蛇去落日人
 如凍蟻行重郭老師今健否
 藏年珍木但聞名定應自掃巖
 邊石時發披雲嘯月聲

訪友人

宋元詩集
日暮荒城倚瘦籐江南春思倍添增那知淮水黃塵昆忽見廬
山白髮生乞食久辭烟際寺連牀今對夜深燈明年我亦尋君
去同涉天池最上層

過孜莫翁

禹穴朝來散髮參一程隨便達雲巖南山任把浮雲蔽西嶺猶
將落日銜幽徑野花開舊菊不牀楸子下高山投宵夜永寒無
寐良憶真僧衣不蚕

大風夕懷道夫郭素

病覺春寒花信重起來散策夕陽中方收一霎挂龍雨忽作千
秋換鷄風淮水粘天雲翻浪吳山吐月鏡緣空二豪詩眼應驚
絕覓句搖知與我同

九日

